

泉州府志卷之四十九

循績

明循績九

謝有大

王居瓚

謝廷訓

蔣廷堅

楊廷相

蘇希棧

洪有聲

劉震臣

黃師顏

林喬楠

陳嘉策

陳宗堯

泉州府志

卷之四十九

明循績

一

諸葛應科

朱于訓

顏魁槐

洪啓采

趙日崇

陳榮選

李禎

王約

張問仁

黃文炳

許國瓚

黃懋中

陳鳴熙

王明慙

楊啓新

張宇薦

謝望儼

蔡用明

盧居安

黃國賢

楊偉

謝有大字同卿號受謙晉江人萬歷癸酉舉人授新安教諭遷偃師令以除害安民爲務吏有受民錢者必置之法不少貸催科無擾聽訟持平以忤上官未一歲署考曰賦稅率用寬徵刑獄槩從末減左遷大埔教諭再遷靖江王府教授歸居深山中足跡不入城市人莫有知者有大茂德淵深孝友切摯一言一動皆依準繩兩地振鐸以道德爲訓行偃邑敷政以省刑輕賦爲子惠委泉州府志

卷之四十九

明循績

二

運而出仕學不渝林居治草屋三間一櫺不具六十五歲始生子懋明爲諸生竟得見其孫與曾孫人咸異之卒年九十二五因山人林如源具狀請何喬遠爲之銘

通志參
楊商澹栖霞集

王居瓚字圭甫晉江人以禮記舉萬歷癸酉鄉薦授滁州學正有童子師某同時爲滁判官每當上官前必推重之曰某有師在上官以此兼重之署州篆撓郡守出冤獄死罪者一人益著能聲秩滿擢餘干令邑多猾蠹朋倚口負急之則譁廉其甚者置之法蠲舊逋與訂期別

所輸賦上下其賞罰期月閒吏無宿蠹而民轉急公亡
何行鹽御史以他事相憾誣劾之調金壇丞邑令故知
其才凡守障戎伍鹽鹺錢穀舳艫獄訟悉以便宜相委
居瓚靡不盡心爲之於是令與丞聲並起上 交薦三
載遷弋陽令將之官竟卒于衢州旅舍年僅五十居瓚
事父母孝上春官聞母訃慟絕歸而病悸久乃瘳父有
外人子物色歸之與家產三之二廣祖父祀田祭日分
胙遍諸宗無闕待母家篤於恩禮得雋後好先秦古書
及世說新語多用之尺牘奏記爲詩亦清穩從順金壇
于孔兼見其行事與撰著皆敬而下之

泉州府志

卷之四十九

明循績

三

謝廷訓晉江人萬歷癸酉舉人授江西德化令強毅有守
不以顏色假人戊子己丑洊飢躬詣潯關坐以待米舫
之下水者量其多寡予價平糴時長洲相方柄國吳商
多以爲名廷訓不顧并畱之曰吾爲百姓寧恤一官竟
以是獲罪遷王府長史去之日父老遮道泣送之

西江志

蔣廷堅字國紳晉江人篤行博學而尤精業春秋其持論
鑄意務在明白正大不事影射牽合諸門徒以傳業顯
者衆萬歷初應恩貢授壽昌司訓轉諭山陰爲人坦夷

忠厚翫直自將所至訓誨諸士皆先行誼後藝文卻贄
贍貧割俸調急不以寒氊爲吝轉漳州教授以年老歸
囊中裝僅餘半載薄俸猶推以赴人之阨輒爲所逋負
絕無計較嘗書無能翁無創翁以示後人焉

舊志

楊廷相字君贊號鍾魯晉江人嘉靖甲子舉人萬歷甲戌
進士授丹徒知縣以清勤得民譽擢兵科給事中陞吏
科右給事中尋轉左戶科姜應麟以請建儲降雜職極
邊戶部員外沈璟亦以乞定大本降三級調用廷相疏
言二臣以抗直觸天威宜曲賜寬宥仍復厥官或量加

泉州府志

卷之四十九

明循績

四

罰治庶言語不壅廷相沈毅寬厚嘗偕刑部錦衣籍故
相張居正家見尋常刺牘悉火之所保全甚衆建白多
大窾係不屑屑毛舉鷙擊一時閣部稱其得體晉長吏
垣前後九年遷太僕寺少卿太常寺少卿南京太僕寺
卿應天府府尹南京通政使乞骸歸未幾卒廷相雖踐
閱九列自奉儉素不異儒生生平不谿刻求名卒之日
僅敝廬一區薄田數十畝鄉邦莫不稱歎以爲清畏人
知焉裔孫賢錫崇禎甲戌進士歷吏部文選郎中

舊志
參通

志
源
文
獻
閩
書
清

蘇希棻字干欽號阜山南安梅山人博涉羣書總角能文十五試有司輒高等有叢蠡集其書櫝作來蠡賦擬於楊班十八爲諸生嗣試第一補餼學使朱鎮山衡拔首泉士檄入五經書院屢困場屋學益勵在京朱衡遣子維京受業御史葛端肅遣孫曦受業其設教紫雲寺則楊道賓受業焉年四十領隆慶庚午鄉薦萬歷甲戌成進士授許州知州自題館窓云強年始登仕路初試卽爲大夫許轄四邑地當孔道喟然曰世好縻吾以簡世好譎吾以直吾不能脂韋養交徒飾廚傳盛標騶折腰

泉州府志

卷之四十九

明循績

五

道旁伺上官聲色以爲吏能其或先催科後撫字張弓季世毋乃鳴鼓聖門於是詢疾苦鋤豪右請停不急之征與民休息諸往來公使橫索郵傳者嚴卻之許有西湖書院集俊士肄業異等者月餼一金請學使檄一教職程督而朔望品題之士翕然向風素以強明白任兼習法令文移皆出己手吏莫從舞文屬邑有二窶人子素相狎甲爲蠶貨郎乙遇田閒以嬉鬪傷甲頭痕血流被面甲仰臥不肯去乙徑荷其擔歸其父大讓責之自送擔投甲家且謝過焉竟訟於官縣當以強盜得財傷

人律希栻曰律以傷人固當若云強盜得財殊未允協且其父已還謝獨不可以自首免罪爲入井者開一面乎竟出其獄會有山西人爲許倅老而墨以前官評左遷移憾及栻其壻倅開封爲圖報復而開封同知亦其鄉人嘗以事追兵吏不關提而徑捉之怒希栻執不遣共嗾於直指直指亦山西人搜求無所得卽以出一死罪爲詞論劾計涖任十閱月遂報罷曰吾燈窓之事畢矣餘事付之後人歸而食指星櫛突烟時斷甘貧守寂課督子孫嘗題於柱曰心裏有天皆白日眼中無地不

泉州府志

卷之四十九

明循績

六

青山又顏於門曰家有舊書惟教子門無新事不迎賓居阜陽山阿土室衡門率兒孫自治農圃漸足資生時與里中黃鳳翔詹仰庇諸公聯社賦詩酌酒敲棋孝友敦睦施政於家修族譜置義倉建祖祠葺梅隴阡履濡橋修霞舒里社築月半洋水壩栽芒叢以障曲溪水患重新雪峯寺築太湖民堡郡邑廉其名屢邀之竟不得一晤林居四十五載手不釋卷至老猶能作蠅頭小楷年九十而終所著有杜詩全集註杜詩選註漢魏詩註選詩集解文選摘註莊子註騷賦彙草管班存質庾生

彙草拾存零草雪峯誌詠阜陽蘇氏族譜通志稿李參霞棲

文集南安縣志

洪有聲字懋文號穆菴南安人隆慶庚午舉人萬歷甲戌進士授信陽州牧信陽地磽确又當楚孔道有聲銳意撫綏不避權豪有許吏目者藉當道戚屬虐而貪以法繩之不得肆爲所中謫大同典史州民數百伏闕訟冤不可得久之轉懷仁令經理互市有方邊人懷之遷蔚州守再轉豫章維楊郡丞分鎮瓜步瓜州當南北噤喉有聲至飭武備增雉堞嚴閘埧保障之功居多晉南工

泉州府志

卷之四十九

明循績

七

部郎念母老乞歸一日忽鍵戶自序其生平甚悉以授其子曰吾志在歌詩趣在山水政績在四方立身制行在閭里耳目不欲以德薄處蹇之身煩當世名公鋪張它日其藏此于幽所著詩集藏于家子啓初亦成進士

南安志

畱震臣晉江人志淑孫隆慶庚午舉人萬歷甲戌進士授常熟今年方二十九嫺習吏事所定徵科法吏民不得欺隱試童子一依科場法依牌派立東西魚貫無得溷者勵精虔事戴星燃炬疏濬白茆踵周禮荒政役飢民

而厚給其直畚鍤雲集甫告竣而吳中大水漂泊田廬
亡算賴是塘以漸泄之時柄銓者方著久任令震臣在
常熟六年陞刑部主事告病卒于蘇州

閩書

黃師顏字有發號復齋南安人隆慶庚午鄉薦萬歷甲戌
進士授鎮江推官以艱歸服除補寧國平反激揚惠德
孚民兩郡如一日以最薦擢御史奉差巡鹽長蘆以清
峻著聲橐無羨金按雲南無金石邀主爵權遷順慶知
府謫判州事歸家杜門謝絕干謁捐充祀田遺產悉均
諸兄弟厚師友急族誼子毓鎮舉孝廉每上公車過舊

泉州府志

卷之四十九

明循績

八

宦故處伏臘謳慕縉紳見毓鎮至且喜且泣曰得見使
君子猶見使君也

節南安志

林喬楠晉江人隆慶庚午舉人萬歷甲戌進士以戶部郎
出守梧州當官廉謹裁罷夙蠹綜核政務尤切拊循蠲
水火災米豁清丈重稅賑傷殘通糶糴處置有條民蒙
其惠兩以覲行不受餽遺郡志先被回祿捐俸修刻陞
本省按察副使退而居鄉名長者

閩書
西通志
參廣

陳嘉策字與偕號葵心晉江人萬歷癸酉甲戌聯第進士
授績溪知縣勤敏仁廉修文廟尊經閣敬一亭及啓

聖諸祠建城隍廟穎濱祠及陰陽醫學其大者則捐俸
造文峯又作事友堂以親士類設廉惠倉以法常平民
爲建仰葵公所繹德祠永惠亭以尸祝之歲辛巳復主
修縣志以備文獻陞大理寺評事歷梧州知府徽州府志
陳宗堯字國仁號愧泉晉江人一道子隨父宦蕪湖父禦
賊南陵被殺宗堯聞訃呼天搶地馳至賊所或語以宜
稍需賊退父子俱斃無益也宗堯泣曰父待我就木何
能刻緩遂行時父歿已七日面色如生抱屍出舁攢于
梵寺倉卒中殞殮如禮南陵將領扣兵餉六百金爲賻

泉州府志

卷之四十九

明循績

九

涕泣謝卻之櫬乘傳歸有語以請增郵廩塗可得百金
者泣謝曰父死謂何忍閒關覓利耶扶櫬行所過州邑
號切之聲聞者流涕入里門所親復語曰君之父死王
事何不北走燕請錄後泣曰君恩也不可干吾痛父血
戰死耳他非敢知徬徨襄事身親畚築與工傭雜作繼
之以慟久之忠烈事聞贈父應天通判蔭宗堯入監讀
書服除入胄學卒業會當試吏自陳願補如父職從之
授壽昌縣丞地脂而僻佐令者向多染指宗堯曰寧有
父忠臣而子墨吏者冰檠自持暮金不入時龐尚鵬爲

直指行部至嚴設廉能貪庸四豎于庭令屬吏自占所
豎下衆駭愕莫定宗堯獨趨立于廉能閒龐公異之按
其行事遂最上考擢羅城令邑爲柳州洞地蠻獠出沒
爲梗至則諏風詢俗專心撫馭嚴什伍興教化修治學
宮請增泮額士知嚮風夷民帖然會大征古田懷遠檄
宗堯轉輸議者謂懷遠可招而撫也以屬宗堯卽單騎
入崗諭以禍福恩信猺俯首聽命適新令猝至致僂令
以殉移古田之師乃克之上功賜銀幣陞平樂府通判
年餘母病歎曰吾以父得官父贈官止是矣吾祿位如

泉州府志

卷之四十九

明循績

十

父足也可有加乎母又病安能母子久居此力請終養
僦舟以待旣歸修恬守讓不問田宅自有司祀父鄉賢

仍構祠于居室之右祀焉

景節璧集

諸葛應科字弼甫號賓梅晉江人父希孟字毅之以吏椽
起家文學質行見重於時應科爲諸生赤貧常自得喜
讀離騷雅尚氣節閒有束脯之入輒以供朋友萬歷丙
子舉人就教趙州以古文辭倡士督學羅文野公檄其
文歎服學者宗焉乙酉分校關中得七人皆佳士遷湖
口今日坐堂皇作利民事舊牘山積游刃理之數日庭

讞爲虛釋淹繫鋤奸吏勸輸宿逋振興文教湖口饑賑救不遺餘力每退則告其妻子曰吾今日出某政行某事如是如是吾不能取民間一錢肥潤妻子顧吾所貽後人豐矣一日上官過迎之江風甚厲應科笑曰吾豈可以性命博官耶歸止宿而上官忽中夜至提所備魚腊嗅之曰此鮑魚也怒去竟以此左遷益王府審理王好文學愛重之請於朝以爲長史居無何御史行部偕左相往謁御史曰爾副相也有其名耳應科曰王門吏隱禮無亢亦無苛遂拂衣歸應科爲人敦行孝弟其先

泉州府志

卷之四十九

明循績

十一

世自宋及明多顯人顧門祚寡瘠墳墓失遺應科跋履險僻按譜尋求家譜一字一事皆心記手書遇父母忌辰闔門垂涕好飲酒吟詩所居書籍遍其戶下壁上錄古人雅語佳話殆遍爲人樂善諱短有懷必吐胸次開豁笑歡終日時以比之醉吟居士

閩書叅通志景璧集

朱于訓字國彝號錦岡晉江人鑑之後也萬歷丙子鄉薦署教許昌大興文社多所造就擢浦江令直己便事靡所掣肘上官如衛如張頗操束濕獨于浦江一切寬假藉以廣厲旁邑彭直指行部至婺謂監司曰吾廉朱令

大得民復謂于訓曰勉之哉勿以資格自限屬台州丞缺將徙浦江爲之疏未上直指坐事歸擢守崖州過家橐裝不備屢徙行期抵州念民夷雜處釁生市易亟下令曰太守所以來固將安之爾詐我虞三尺是徵自是夷守黃龍之約晏如也復爲崖人修學宮輯志書文獻大備遷柳州同知攝府事有賢聲思明叛持以鎮靜操縵得宜夷人解散條兵食便宜數事皆百世利滿考薦授知府相繼聞內外艱起補廣州同知復兼府事百務殷繁心力交併囊中則蕭然如洗以覲行至河源疾作

泉州府志

卷之四十九

明循績

十二

卒于訓丰容粹穆莫可涯涘與之處久而愈親居家恂恂言不出口及當官則山立雲垂毅然難奪故所至事集民安去而見思

閩書

顏魁槐字奇黃號植庭晉江人萬歷丙子舉人授東安教諭畿內北地鮮文教之倍生藻采三載陞知廣昌縣一誠自將幅尺不踰邑賦役產業多出豪右明約申條剔蠹緩徵自是無敢逋賦小大之獄剖析以情鳩士講藝程其甲乙有貴人方爲吏部豎棹楔侵民居魁槐以理格之一無所徇貴人銜之多方媒蘖竟不能加丹陽姜

志禮時爲建昌推官雅重其人及來守泉式閭焉在任三載遷楚雄府同知未幾遷襄府長史遂告歸魁槐七月而孤終鮮兄弟依母爲命其族兄理學資之以成名又先未子以理學之子爲子至六十三歲始得子孕百以妾生子時年三十七合已而成百也年七十九卒與理學同塚葬焉何喬遠爲作兄弟異乳同域記

閩書

洪啓采字爾載號敏齋更號常九南安人居晉江萬歷丙子舉人初授泰寧教諭課士首拔江日采後成進士人

泉州府志

卷之四十九

明循績

十三

謂知人擢國子監學錄識拔尤多出守許州行法以寬暮金盡卻訟牘片言立決爰書盡出手裁上官盡知其廉按故籍行田里謂此漢棗祗所稱膏腴可屯田處也今斥爲澤鹵化爲芟牧寧能歲無饑於是發廩粟按貧施賑全活萬數迺復引民浚陂池穿潁水渠行數十里溉田中斥鹵盡得水可令畝十石招徠流民給之墾藝又爲民建義倉二十餘所令富者輸粟其中自出鍰金買粟儲之畜積旣多歲益無虞公餘召士講書論文其所賞識者多登科第有張令坐謗書事未白不得歸一

家十三口極力全之爲白其冤事竟解李州判居官清白薦之上官及擢爲令行李蕭然捐俸佐之啓采在許三年上官薦疏六七上擢湖廣永州府同知適從父心菴公轄楚藩例應迴避另補竟以病乞歸尋卒

閩書叅景璧集

趙日崇字因甫晉江人恒子萬歷丙子舉人任南康令廉明惠愛有才畧治民如家纖細皆爲區理設社倉裁鹽餉以恤民艱立文會創學田以興士類士民愛如父母五載陞應天推官積年滯牘剖決無餘請託不行擢南刑部郎忌者中之復謫新城令其治一如南康未幾以

泉州府志

卷之四十九

明循績

十四

親老投檄歸圖書四壁蕭然自樂而贖宗女撫孤甥義行尤爲族黨所重云

舊志叅閩書西江志

陳榮選字克舉號鰲海同安人健孫榮祖弟萬歷丙子順天鄉薦初選劍州牧未行丁內艱復補儋州別戶數清訟獄申六諭勸農桑建飲恤堂於蘇長公之載酒堂傍率士子講學其中有拾金者爭首發榮選斷歸拾者而責首者曰天賜彼金不平何爲稅璫權稅驛騷民苦之榮選故饒資重義運家中貲以應徵役不賦民戶不費官帑民戴德出望外黎人梗化撫而招之不用命就俘

者察其輕冒縱而釋之題其刺而讞之牘曰冥積遷廣州同知攝篆香山海舶所湊夷寶所聚揮鋤金而歆貪泉一如平昔稅璫欲多稅額榮選爲香山人力爭侃侃披陳一洗官場脂韋之習見璫意形於色遂棄官歸榮選歷官州牧府佐一轉一退父老並肩城闕裝遮道泣畱儋廣人皆祀之在家孝友好施出爲人後事其父母並隆所生里人黃姓有兄弟爭死之誼久繫獄中白而出之衣不重彩食無兼肉有以緩急相叩靡不應者居恒手不釋卷車途客舍莫不挾冊自隨所著有易四書

泉州府志

卷之四十九

明循績

十五

旨禮記集註南華經道德經註解

閩書叅
遜菴集同

安志

李禎字克輔號幹宇安溪人森元孫萬歷丙子舉人授安化知縣途中賦七言古風列書于穿堂屏風上中有潔身無愧影國計同家計之句值皇木起運竭力調停郡大猾吳喜琅兄弟毆官暴橫捕治之刻梅山譚藝以教士捐俸築泮宮泮池省詞訟息追呼將及考滿適鎮闔陳奉妄指縣有硃砂礦刻期興役奉鎮楚橫甚上官莫敢議禎曲奉而陰阻之事竟寢邑賴以安薦陞茶陵州知州管湘鄉縣事憑未到會川中楊應龍作亂楚稅璫

復起瀏陽尹驚逃委禎以安化帶管徵糧給餉代挨免積餘派銀三百兩赴湘鄉任安靜無擾不惑於毀譽不輕押牌票民有筆貴耳勁之謠以不能結奉上官爲巡道朱密揭浮躁再調臨高地瘠民貧禎仍鎮靜理之公聽斷勵學校賢聲蔚起鎮闔李敬開礦在縣界內往事莫可挽回惟加意寬恤之復因地震請敬身臨視緩礦稅並罷賠礦銀以供開礦費者通府州縣皆席其庇旣朝命罷礦礦商慮失利益募亡命夤夜開鑿禎遏其外入者漸遣內出并禁米毋入礦礦徒立散陞荆王府審

泉州府志

卷之四十九

明循績

十六

理以病告歸年七十四卒嘗作狷介篇以自志言中行難造狂者不可得不屑不潔不爲鄉愿唯狷者耳平生淡約簡樸矢志不欺或可附焉又著有問奇便覽仕隱緒言家藏年譜宦中獨鑑及安化所刻梅苑談藝諸書

閩書參
李氏年譜

王約字伯一號仰石惠安人奇橙孫以佐子隆慶丁卯舉人萬歷丁丑進士仕行人奉使粵韓有廉聲其時張江陵爲相喜彊忍猛厲才能可任用又善占風望氣而順事之者約一木強人耳任滿僅改戶部主事轉餉昌平

督兌江右悉心清釐尚書殷繼茂稱爲能殫其才潔其
守出守惠州立剖冤獄郡服神明丁外艱起補瓊州瓊
有牛稅稅入一年可二千金約除罷之曰太守牛僧耶
先是郡司理視瓊篆庫藏不潔清約至執問主藏吏坐
爲司理所中調平樂興賢禮士識拔毛文沛文治兄弟
同榜魁解值猺夷擾邊繕城修備殲之畫策善後餉金
之羨以數千悉予通判擢備兵左江兼轄右江諭以威
德進以文學士酋韋文燦爭襲相噬禍及數州嚴諭惕
之投戈受縛按部太平酋長獻金責而遣之交南夷爭

泉州府志

卷之四十九

明循績

十七

主其國事求啓關奉貢舌人私語約公但受其貢物主
國事者定矣約曰天朝所重者名義杜關力卻之楚中
皮林夷告急三省會勦當事者檄約督餉餉三月行閒
無染將卒歡悅事聞賜銀幣遷叅政適有賫捧之役歸
過里門遂不出約俊爽平淡不設城府事有關鍵則蘄
然不易孝親弟長敦宗睦鄰雖田父野老莫不親近在
惠州有漳人王仁越貫入海豐學士鬪甚而約力庇之
後登科在瓊時閩商有困海禁者爲疏洗之親朋渡海
而求踵至踵應無難色其中飛語以此里居時上官督

惠邑漏稅以千金力言免之故所至有長者稱年八十

四卒所著有飛鴻日章

閩書叅
惠安志

張問仁字孟春號錦亭晉江人隆慶丁卯恩貢第一入北
雍萬歷丙子順天第五名舉人丁丑聯捷進士授戶部
主事丁內艱服闋赴補初問仁貢至京相張居正延爲
西席二子及第皆其門下至是居正敗問仁謫爲興國
州州同轉鳳陽通判復調順天所至皆稱職奉差粵東
過里復命陞戶部郎中出權臨清稅務加意恤商而稅
額無缺未朞年疾作告歸卒於家年甫六十宦橐蕭然

泉州府志

卷之四十九

明循績

十八

周身之具或不能備問仁博學多識正直不阿當居正
烜赫時常以微言箴規之所任皆閑曹故事蹟鮮表著
然已可見其概云子捷登崇禎己卯第一名副榜

黃文炳字懋新同安人善書能詩萬歷癸酉舉人丁丑進
士任東陽知縣爲民履畝以免賠累擢南戶部權淮安
關關陳紫峯琛舊所權處也文炳至署其堂曰仰止其
行政皆師之擢守平樂政治持大體開賓興修郡志猺
獞子弟擇其通文字者束以青衿皆瞿然向化置驛馬
復餘田民甚德之擢雲南副使署督學事礦使鄭某虐

焰殃及諸生意欲主司詰治以謝之文炳不可遂矯誣
論劾先後列二狀獨蒙溫旨且詔礦使無生事時稍忤
中使者輒被逮繫恩宥自文炳始遷陝西叅政卒弟文

炤

閩書叅廣
西通志

許國瓚字鼎卿號仲葵晉江人與兄鎮江守國誠後先登
第國瓚萬歷丙子丁丑聯第進士授南京禮部主事丁
外艱歸服除改戶部出監兌蘇松催攢有法官民稱便
五載擢廣東僉事駐北海處置珠賊得宜全活甚衆殄
除李茂等叛黨兵不血刃有被脅從者已臨刑察寃狀

泉州府志

卷之四十九

明循績

十九

立出之晉貴州叅議以內艱歸會徐聞令被糾科臣謂
司憲有所曲庇當左謫服除得楚郴州牧約己裕民聽
斷平恕歲餘遷南京戶部員外郎三載擢守桂林遞擢
副使叅政皆在西粵粵苦猺獠劫掠異時官其地者動
以剿殺徼功國瓚分巡右江賓州八寨猺常出沒第以
恩威戢之不煩一旅羣獠帖息民得寧居旣去人思而
祀之晉山東按察使未三月以入計行歸卒于官時已
遷江西右布政國瓚精采敏瞻克勤小物與人交坦夷
重然諾慈惠煦沫下及輿隸俸入均諸內外姻戚不以

自私泉中兩庠暨鄉三老爲請祀鄉賢舊志參閩書

黃懋中字有及南安人河清姪萬歷丁丑選貢入成均大司成呂公濱溪與山陰王相公咸器重之銓授封川令邑當兩粵孔道供億頻繁懋中出俸貲以佐役費凡舊例一槩革除遷學廟復學塘魚租歲給師生秩滿擢判瓊州念親老不欲渡海移檄歸養直指王梧岡力止之未幾父訃至服闋補蘇州判掌織造鹽局一切規例毫不苟取署吳縣有大獄久冤繫者沈佐倪臣商海雲等懋中申釋之三載報政乞歸兩臺登之薦剡不爲少挽

泉州府志

卷之四十九

明循績

二十

歸家鍵戶讀書不問外事有司相知厚者亦弗干以私自號谷谿子取老氏爲天下谿天下谷之旨以自寓云初年與蘇紫溪李文節溫晦吾柯立臺劉國徵爲文字交意氣相勵文節罷相家居邀與論文年九十三卒封川士民祀之名宦所著有南安文徵私志文節爲序之

南安志參李文節序

陳鳴熙字緝甫號穆莪晉江人年十九登萬歷己卯舉人授江州州同察民冤苦江州與湖湘接壤猾民潛掠人口過江賣之裝時倚疊艙下雜喂牛馬於上獲重利不

貲設法偵捕無漏奸全活者衆薦擢欽州未任丁內艱服除補固原未幾丁外艱起補無爲州江北劇地重以澇浸爲災至則寬歲租行補助庶幸及秋忽淫雨大作圩岸盡圯俛平雉堞鳴熙禱天願以身當河伯爲民請命已潮勢頓減田畝無恙乃大發金錢築壩按地形勝覘河脉殺水勢使不得橫行食寢爲廢凡勞徠若而旬始就緒三壩巋然黎民永賴署右有宋米南宮寶晉齋墨池舊蹟適弟兵部郎中鳴烈奉使過稅駕亭上相與命酒賦詩州人喜傳焉報最擢雷州府同知至則攝邑

泉州府志

卷之四十九

明循績

二十一

篆供事棘闈鞅掌不給又奉檄赴瓊筦查盤渡海往返者再值大計後郡邑多缺數篆紛委固辭不免東奔西馳炎暑交中遂卒于官蓋前兩日猶視事也年五十九

子昆奎萬歷丙午舉人

採雲臺藏藁

王明愨字懋良號衢源晉江人萬歷己卯舉人授當塗教諭卻贄餽與諸生講經論文當事悉重之凡吏治風俗文章必咨焉辛卯分校江西所舉皆佳士御史委選觀風試士文獨賞朱蘭嵎公當魁天下朱久困場屋聞而執弟子禮後果驗新守送新進生入學令學博受拜堂

下抗言曰堂下豈師席乎令引席堂上守不能奪銜之
繼而送貢宴貢生郡堂置師席于經歷衙白于守曰宴
雖爲貢然尊卑有禮不當抑尊以伸卑從之擢仙居令
欲水茹檠愛民禮士葺文廟定婚禮禁溺女均丁米
徭役榜其數使戶知所輸爰書必慎獄訟清平時有主
簿曾學周殫心輔政以廉能稱相得有成會大計太平
守挾前憾中之計日當吏部侃侃庭辨浙觀察蔡公揚
言曰此廉能吏也安有人砥操于縣官而失腳于學博
乎事白至仙益畱心民事加意造士郡節推子與所私

泉州府志

卷之四十九

明循績

二十二

人過縣飭廚傳待之如禮其人怪無長夫明愨投箸厲
聲曰邑有短夫安得長節推不能有所加四明相起田
閒浙上下吏各致禮及門獨明愨無片牘沈異之後入
覲謁者俱謝去獨延明愨見之遷寧波通判送者如雲
車爲枳立祠捐田祀之至寧波會余沈二相家方興大
獄各以婦壻非命爲辭委鞫無任者以屬明愨召而寬
譬之曰爾兩家欲爲子訟冤不難按法從事奈此六尺
孤何縱使不爲兒女地獨不爲孤地耶安得祖父母外
祖父母令其孫並日視父母受刀火之慘耶不聽且檢

如法兩家聞之泣下各願求息遂申報兩臺以赦前事
銷之於是兩家俱感其善全至稱爲恩人而上官益交
推重自是署鄞署定海署新昌無虛日會郡同知新至
居閒心憾其不遜已語稍相侵明愨遂告歸採景璧集
浙江通志
楊啓新字日燦號文源晉江人萬歷己卯舉人授滋陽教
諭丁外艱復補增城諭署新安令與民約法三毋逋稅
毋爭毆毋爲盜皆奉約束邑產毒草嚴禁輕生奸賴澆
風頓戢退語其妻曰吾活人多卽三槐可植矣五膺薦
剡遷海門令豪猾匿尺籍飛詭爲害又伺兩造短長操

泉州府志

卷之四十九

明循績

二十三

縱邀賄清覈捕治之竟爲所中左遷束筦丞署邑篆及
龍門香山振刷拊循備至已量移武宣令居民誑猺夷
代輸賦而賺匿之多逋賦召猺人諭令自輸自是賦無
後期時喜事者議乘其相攻剿之又議於潯江界設營
兵加賦召募力爭得止邑百工皆東客奸民夜焚籬恫
惕之聲言盜發詢知其主名捕置之法四載遷左州牧
州三十六鄉各有豪家主之轄其土田役其民人卽殺
之無敢問痛繩以法任怨不顧歲例幫南太兵餉民夷
牙錯區畫靡定爲劑量置籍民夷稱便以安南調兵敘

功得紀錄病歿于官橐鏹不能成斂啓新循循樸謹實
心愛民不求人知爲牧令五載布衣疏食如一日左州
人祀之名宦著有蒙筌易說子瞿峽原名載萼丁未進
士舊志

張宇薦字道相南安人萬歷己卯舉人初授長樂教諭與
諸生辨析理義尤精於易學多士皆從之受易陞新寧
知縣會播酋作亂上方畧於兩院用其策卒以平播丁
外艱歸以不獲終養爲痛遂絕意出仕以書史自怡葺
學宮修橋梁輿論稱之卒祀鄉賢南安志

泉州府志

卷之四十九

明循績

二十四

謝望儼字可容號泰宇晉江人入南安庠萬歷己卯舉人
授滁州牧勵意拊循不爲鉤距之政署外設爨房以受
訟近者攜壺漡遠者備宿糗片言立決雖他郡爭來質
成焉滁爲南北往來之衝稅密而差重郵繁而役苦儼
裁稅額卻餽賂極意節愛以甦民困遇早步禱立雨月
課則捐俸賑士泣官僅六閱月卒橐無餘金喪襯南還
滁人焚香遮哭之後祀鄉賢孫元珧天啓乙丑進士浙
江叅政閩書叅南
安志家傳

蔡用明本名霽字用明以字行更字晦仲號見南同安人

萬歷己卯舉人性孝友母蚤卒事父甚謹兄弟五人推衣食無閒乞恩授大田教諭丁父艱服除補長泰斂士人豪舉之氣範諸禮法有諸生隸郡庠且不相識爲怨家所中白學使者直之而拒其謝邑士大夫爭結歡數與過從談名理甲午分校楚闈得士八人其五成進士陞樂至知縣修學課士縣有採木之役大木所產皆邊夷焚道岡壑箐崖絕人跡去治所數千里故事給官鏹募民役先是多相冒規免展轉株累又民苦先出募錢事竣竟不得官給往往破家用明下車見耆老人給小

方令疏注鄉之巨戶各以所臆疾書毋得交語既上爲叅稽糧冊閱其丁賦之上下比證甲牌覆其塵居之多寡然後榜示占役者姓名於縣門丁弱賦強則賦其金募人不任者許自訴而蠲其實者扶其誣服與妄求免者乃更爲立補助之條定番休之規信給領之令往役者官護其家禁奸民毋乘出造獄擾之木分三運以十之六爲及格用明最後乃滿十採木己邑中旱疫相繼用明按籍勤撫以紓之優禮百年黎邦价予冠帶歲時致餼課士出俸鏹供筆札茗饌而大作新其廟學豪骨

犯科求贖不許必痛懲部使徵無礙金據理折之氣短
而止遷淮府審理未行又有征播之役大發民夫餽餉
用明猶精心爲之部署行伍相補助戒以緩急相扞如
其初至調度採木時督木使者過縣民擁車言令治狀
涕泣祈畱軹不得發臨行猶奏記督學肅廣多士解額
及發舟泛裝岸石以壓險陸績鬱林非虛語也子復一

閩書叅
遜菴集同安志

盧居安字惟深惠安人少聰穎嗜學萬歷己卯舉人初知
霸州居安以幾輔重地肅紀振綱導窾批卻務在培養

泉州府志

卷之四十九

明循績

二十六

本原而吏治首冠三輔嗣丁外艱補涪州州故文翁程
叔子所過化地居安飲冰表俗興學講藝革公需寬民
役減監稅蘇皇木商播酋楊應龍叛調兵協剿改建遵
義府清文官民地計四十一萬二千二百畝畫圖紀之
陞廣信府同知郡務蝟叢居安兼理郡事病劇猶日親
訟獄簿書以斃子士櫬鄉薦

惠安志

黃國賢字士尊號東溟晉江人潤孫萬歷己卯舉人司訓
漳平有聲入爲國子擢工部司務故事司務與司官更
掌關市錢庫稍稍取自潤國賢獨辭避擢戶部員外郎

轉郎中筦太倉庫節嗇獨至時有征播之役軍興徵發國賢所司當輸金十萬往數皆盈貴撫郭子章勾其額贏他輸六百餘金大驚曰安得郎清若此移咨大司農重褒異之既卒堂官令同舍郎檄其出入簿文書纖毫無染手嗚咽歎服捐俸厚賻之

閩書

楊偉晉江人萬歷己卯舉人授餘杭令政尚簡易歲饑請發預備穀賑民不待報輒發倉守者難之偉曰饑者待哺能須臾緩耶督學來試偉力爭餘杭人材多而取數較諸邑獨少請復未汰時額是年補弟子員者三十八

泉州府志

卷之四十九

明循績

二十七

名後遂成例邑士德焉

浙江通志

明循績十

張治樞

謝吉卿

謝台卿

朱天應

張憲可

張日益

黃巍

鄭啓芳

柯有斐

蘇朝陽

吳龍徵

莊履朋

劉會

龔廷賓

尤應魯

龔雲致

林寅賓

李光綬

黏鍾崑

許鳳賓

陳鳴華

蘇舜臣

傅慶貽

鄭得書

陳濂

李仁

金時舒

潘洙

蔡獻臣

黃華秀

李伯元

林喬木

泉州府志

卷之四十九

明循績

二十八

鄧鏣

陳廷詩

曾偉芳

何居毅

丁日近

郭日烜

陳基虞

柯鳳翔

張治樞字明勵號環中晉江人治具弟嘉靖甲子副榜隆慶庚午舉人萬歷庚辰第進士觀政吏部丁內艱服除授戶部四川司主事大司農王繼津公于諸曹中獨奇之一日出各省糧冊委令稽算限以三日如期應之怪其敏意出吏書手因隨摘某郡糧額多少扣之對荅如

流自此益加推重有疑事必延之議卽他司事亦諮焉時覆冊弊屬雲南司以委樞覆不得已承之內款曰冊紙須極白極薄雲南司憾其越俎抄案呈詆云紙宜厚不宜薄司農曰不然薄則洗補之奸塞矣其倚信如此會有旨借支邊銀十萬實內庫諸司錯愕莫知所出樞擬本云糧屬邊儲係國家安危何可動支且邊事不測卒然有急胡以應之疏入事遂寢邊軍告匱司帑詘筴上言不給大司農患之令區畫題本卽昌言曰本色支給有餘但陳陳相因腐敗不可食耳郡邑不便水運者

泉州府志

卷之四十九

明循績

二十九

宜暫改折以濟時急異日太倉之儲或有不支則成憲在也大司農然其議請而行之亡何部議推監越兌例本科不外推辭焉大司農曰固也越弊多端非仗公振刷不可抵越則正量斛驗燥濕搜剔蠹蠹運官豪右無從侵沒時改折之議方行或稱不便撫臺溫一齋公以爲問馳書荅云法貴趨時事在變通云不便者徵本色可也云便者全議折徵可也如杭之新城於潛昌化邑僻山陬距水甚遠則全折爲便富陽一邑在東南西南鄉則山徑而折徵爲便在西北東北鄉則水運而本色

爲便諸如此類度地行之不格成憲國無滯兌民不苦
漕矣一齋公深然之嘗論兌司有三難一邑令貌相承
心不相下一郡倅而下屬視之則決齧不馴非屬視之
則體敵易抗一徵發之令非藉郡守監司藩長不得行
知此三難故在浙上下盡與交歡亦未嘗以法假借人
竣事還報所獎劾皆當輿情未幾又有明智草場之役
夙夜勤勞不以瑣屑稍懈有運芻秣少額者法當罪令
修葺場自贖竟不葺而妄揭場佐官受醵治樞廉佐者
寃而重罪揭者自是部中肅然久之遭疾上疏乞歸主

泉州府志

卷之四十九

明循績

三十

者稔其才望欲改之銓曹故不得請竟卒於官治樞自
幼以兄治具爲師故言動舉止持己居官一以治具爲
法除兌例之金卻暮庭之饋身歿而宦橐蕭然在燕諸
縉紳視殮哭之過越吏民道祭哭之至家子姓族戚哭

之

採景璧集

謝吉卿字修之號月航晉江人潮州守光之後隆慶庚午
舉人萬歷庚辰與弟台卿同舉進士仕清江知縣以慈
惠撫民先是令清江者爲郭恭定惟賢遂有郭父謝母
之稱坐場屋事謫粵西臬幕掌教宣成書院粵士服膺

其教委署興安縣勵精爲治不以代庖因循調浙江泰順課牧養藝黍稷建義倉立借貸法一年而瘠者以腴贏者以豐調繁海鹽令賑盈塗之殍築沿海之塘皆捐俸爲之巨姓殺人以計脫亡捕而置之法有豪奴結官凌主且援婚主母之族吉卿力摧之判令離婚人稱快焉嗣以曲庇前令獲罪御史前令不知反含沙譖之被劾歸吉卿爲詩和平穩順格律不失其長篇累句追步古人書法尤工歸家集同人結社吟咏推爲祭酒年八十一卒姪望儼

閩書

泉州府志

卷之四十九

明循績

三十一

謝台卿字登之號韋紳晉江人萬歷丙子舉人與兄吉卿同登庚辰進士授教宛陵分闈京畿歷大理寺評事寺副寺正出守韶州裁冗費省刑罰抑豪右汰髡緇立蘭會以課士培龍脉而興文三年四登薦剡陞粵西副使籌征徭善後事宜轉苑馬寺卿有倖侵剋藩祿激怒宗室台卿按之以法立解其官丁父憂歸旣釋服不圖復仕日與知己及兄吉卿觴詠自適敲棋賦詩人有相侮者茹之不計或有沈寃必代爲表白伸雪頻述艱難以訓子孫惟恐覆墜台卿口吃而自然質任一無枝拄在

韶州有他郡守中傷其倅爲白冤誣得直乙未覲回夜渡蠡湖狂風蕩舟晨旭方霽有三老者謂受吉人之庇子病殆見衣緋者手援救之曰我故某倅感尊公厚恩故來相見遂不藥而愈年八十餘卒

閩書

朱天應字國聘號任齋晉江人萬歷癸酉舉人庚辰進士授刑部主事奉命恤讞粵東治爰書爲諸道冠和平民以兄姦其妻昏夜殺兄論凌遲天應言兄姦弟妻律應絞昏夜殺之非故也軍人余一隆以瓜皮雕印行使得金一鐙三人分之坐大辟天應言瓜皮與銅蠟木石有

泉州府志

卷之四十九

明循績

三十二

間三人分一環俱論死過重矣興寧民崇高童子也其母與伯氏相惡殺伯氏而崇高與母同論死天應謂小弱子不能止母之惡又不敢自己之冤情可原也海陽民大通娶婦未成室母怒毆婦通助之婦死論抵天應言通心在順母無抵償之理揭陽民汝泰詐爲府公文原案引詐爲都察院文書罪坐絞天應言府文終與都察院有間以上各案俱從矜減出爲肇慶知府持大體不苛細審聽虛懷霽色人得盡言民間利病靡不洞察郡有黃江廠稅以備軍興守故親泣之後委之幕佐多

詆欺天應裁罷其無名者分委僚佐邑令取充額而止
不沾一鬻事上官謙讓維謹有所不可必執法爭有李
陽春巨猾也吏捕不獲謬執其黨繫之天應訊出其黨
不治監司怒佯爲苛推官語天應曰訊者守也守知出
無罪而已然陽春且出姑待之不聽取中丞指論決無
何陽春出監司爲愧擢廣西副使備兵桂林以養母告
歸天應少孤事母至孝視母恒中夜起稍疾病徬徨廢
寢食祖鑑嘗按粵有遺愛爲修其祀刻其奏議仍以教
粵民旣歸復爲立祀田於家廟撫兄弟之子及戚屬具
泉州府志

卷之四十九

明循績

三十三

有恩意仕宦所至不受囑亦無所干升沈顯晦一
年五十九卒於家

張憲可晉江人喬相子萬歷壬午舉人知青田縣慈惠恤
民公編審而戶口均裁科擾而坊里省禁胥役之索詐
革保歇之兜侵惠商除害善政種種縣有羣奸構黨依
憑肆虐悉取而置之法以不畏強禦爲當道所推擢處
州同知先是商人蒙惠者慮憲可遷去前害復生相率
訴于鹺司行文立石當關以示遵守其利賴垂之無窮

云

閩書叅處
州府志

張日益同安人應星子萬歷壬午舉人令靈壁始至下寬恤之令與利除弊務殫其猷時河工興作動派里夫民苦額外之征十室九竄日益申文臺司第用帑金招募或願赴役者如數復其身上司急催役日益具靈壁饑窮狀請寬之以賦不及格轉王官老幼泣送之爲立去思碑歸而貧甚所論著充然而有文詞

閩書

黃巍字以恒南安人萬歷壬午舉人初署寧德教諭捐貲建文昌閣月出私橐爲會以勸課諸士蠲新進之贄以惠貧者秩滿陞唐縣令時礦使繹騷民敝歲祲巍躬循

泉州府志

卷之四十九

明循績

三十四

阡陌濬水利捕蝗虫問病苦革地稅數百金復繕完雉堞不費民一錢一時名雋皆其賞拔積資五載聲騰九剡竟以清介齟齬于時罷歸啜粟飲水蕭然自得其祖居邑之廿三都歲時謁祖則與宗族鄉黨修孝友明齒讓一切外事不問云

南安志

鄭啓芳字馨甫號春麓南安人萬歷壬午舉人授羅定州學正以脯修贄謁者卻不受召語之曰吾爲祿仕非爲利仕無污蠹我州鮮知學諸生强半南海番禺人喜訟嗜酒譏訕長吏飲市中酒酣脫巾叫囂與市人無異啓

芳立約與更始閒懲其弗率者坐臯比與諸生論難五日一會六日一講評其文下上之仍自爲程式明倫堂與臯廡隔垣異時督諸生升堂不鳴鼓啓芳使擊之諸生成言其故啓芳恚曰講鐸不振謂設堂何竟擊成響士心競奮臯使者聞之益加敬重督學陳荆山稔其學使校所取文以梓窮晝夜雌黃尋瑜摘瑕閒一點竄遂成全璧竟以勞瘁卒于官年五十一諸生問病視殮爲位而哭圖像祀之送櫬千里贈賻百金道途設祭父老有泣下者啓芳事母孝撫介弟友與人交信臨財以義

泉州府志

卷之四十九

明循績

三十五

周人之急銳身先之傾囊焚券家漸落歿後五子三女

一貧如洗云

節景璧集

柯有斐字展夫南安人萬歷壬午鄉薦授武進教諭因公憤與別駕高某抗爭復以泮宮故地抑勢家侵佔兩院咸壯之辛卯聘較山東所舉士多成進士者轉國子助教遷戶曹轉員外郎出權江州時中使兩據江津銳意稅課而南康守逮繫百司凜凜有斐挺然革退所送彪役孫鎮等十餘人又以清役忤津要丙午轉貴州郎中清廊庫弊及折鈔羨餘五千金未幾稱疾歸疏凡三上

始獲命居鄉不事干謁郡縣賓請皆不就子鳳偉崇禎

癸酉舉人

南安志

蘇朝陽字廷鳴南安人徙晉江宋忠勇緘之後以選貢領萬歷壬午順天鄉薦授濟寧州學正加意育才課督經義歷寒暑不倦陞懷遠知縣懷故廢邑獠獞雜處三經殘破官餼舍融縣以居隆慶中議城其縣于坂江蠻殺主簿以叛自是莫敢問朝陽至則單騎遍歷諸崗面召與語諭以禮義遣辨武吏習蠻事者詳言解仇開江之利諸蠻稍稍喜崎嶇山谷閒撫摩霑接約束省禁人益

泉州府志

卷之四十九

明循績

三十六

屬心其最悍者曰標口楊溪小喜敲頭等村故倚長棘毒弩負險自封朝陽遣尉鄭良愨往諭良愨入諸蠻趨居羣立徐徐聽語亦開心願輸賦如舊於是白之撫按請成城遂卽其地之丹陽鎮城焉朝陽實心措注版築不擾坐臥小舟戴星出入蠻之人不見其爲令也皆以爲親已居一年廨舍壇宇樓櫓榮柵煥然一新儀門左右楹有二鶴來巢可俯而闕人咸異之復爲詳請立石嚴禁科派一時民獠傾心向化所至加意拊循其始與之爲長揖好語煦濡之漸次教以跪起之法授以句讀

之學然後禮讓漸生文教聿興百餘年狡獪侏馱之俗
易爲桑麻衣冠之地撫按交薦之加慶遠同知署縣如
故尋陞柳州知府其治民訓士益勵夙夜府庠殿廡重
建一新創尊經閣刻忠孝二經頒布州縣事聞賜金加
慰諭焉祀柳州名宦

舊志參閩書廣西通志南安縣志

吳龍徵字堅孺晉江人喬柏長子萬歷癸酉舉人癸未進
士選翰林院庶吉士授監察御史督攢漕運舊官旗運
艘率附裝杉木雜物艘重舷去水數寸往往敗事龍徵
大行摻詰論指揮使二十五人于法適颶發艘以輕得

泉州府志

卷之四十九

明循績

三十七

濟巡按山東黃縣民聚訟其令訊得諸墨狀疏禡其職
有豪紳子爲暴於里訟之者十五家方飭訊而都御史
書至龍徵不顧卒置於法東省饑龍徵視賑有民鷄飛
觸其冠吏屬懼龍徵神色自若且曰無驚百姓己丑請
告辛卯補浙江道疏乞寬宥言官巡廣東陞河南叅議
以內察謫歸蓋爲前書囑宥豪紳子者所陰中云起判
南通遷四川順慶府推官未任擢南京戶部主事歸家
卒龍徵性孝友力學博奧著若脫集枝繫集卮螺集及
左傳彙編藏于家後祀鄉賢長子逢朔崇禎戊辰進士

廣東高州道次子嘉生天啓丁卯舉人廣西潯州知府
莊履朋字中益晉江人一俊孫履豐弟萬歷丙子舉人癸
未進士授戶部四川司主事爲大少司徒所賞識曰忠
實精勤郎也推管本科每封事若撰結輒屬焉咄嗟淋
漓奏未嘗不稱善已授之事事治任之勞錯勞錯理其
赴署入常人先出常人後四川司故無題名礮石題之
自爲記冬有京衛冬衣布花之役同事省臺兵曹各一
人分衛給之履朋獨以敏稱卽嚴寒必身涖質明而給
日中而罷曰此天子所以衣衛士恩甚渥何敢稽哉諸

泉州府志

卷之四十九

明循績

三十八

衛士人人挾纊竣事當舉劾武吏賢否故甚淆愼覈進
退靡不當者諸公喜曰始謂莊君年少嫻於辭不圖其
習於吏如此履朋益敝形竭精務答知己大司徒疏明
智草場屬監督先是監督者以他委去芻秣之給愆期
矣迫歲當奏報是時履朋已病力疾馳給之竟日坐烈

風中病劇不兩月卒

採梅
谷集

劉會字逢甲號望海惠安人隆慶庚午舉人萬歷癸未進
士授蕭山令築西興鎮石堤及龍口閘捍海爲田數千
頃民祀之鎮海樓擢御史上建儲及東宮講學疏巡按

廣東過家值倭警以久入民籍寺田增價至萬七千有奇民不堪命卽走白當事悉從蠲免至粵會歲飢便宜發賑復以鍰金置義倉再按雲南礦役方興中璫橫肆會力持之卒罷璫出爲江南叅政兩載致仕歸里人感其蠲田功爲立生祠於登科山勒碑誌焉弟春

通志參

浙江通志

龔廷賓字可賢晉江人萬歷己卯第二名舉人癸未進士授縉雲令心切撫摩才優振刷重建賓館移置譙樓縣治煥然改觀其經畫荒政疏通水利尤爲民賴俗生女

泉州府志

卷之四十九

明循績

三十九

多不舉爲申禁條全活無數擢戶部主事歷員外郎中奉差監兌浙江出守肇慶有惠政丁艱歸送者塞途起補廬州守時開採方輿并及于廬衆皆宿喙廷賓上記大府謂府治附近陵寢開礦損傷龍脉萬歷二十三年水滄泗陵議欲由廬開河洩淮水於巢湖以達江識者謂龍脉之地聖子神孫鍾靈毓秀一有差錯萬死莫贖是以中止矧今日可爲不急之役遍鑿諸山以斷來龍之脉乎又查萬歷二十五年有詹事府錄事曾長慶妄請於霍山六安之間開礦部議以恐傷陵脉欽奉停止

有券可查上官據詳題奏朝命遂寢君子以爲讜所著

有居家懿範等集

閩書叅處州府志龔氏家乘

尤應魯字爾言號絃室晉江人麒第五子麒宰武城夜夢子游入謁覺而生應魯故取是名少穎慧絕倫博涉經史擅文名以儒士應試萬歷壬午癸未聯登進士與李廷機同出蘇濬之門授新建令涖政精敏若素習甫三月丁內艱起補海寧浙東劇邑民俗梗悍英雄武斷持有司短長用惠文彈治之中猾以下凜若懷冰其於滎黎單赤煦嘔備摯會歲大侵捐俸發廩多方賑救民賴

泉州府志

卷之四十九

明循績

四十

全活德而祀之分校棘闈得雋獨多銓部錢養士其著也以最徵遷臺瑣有日適邑中權貴人授旨欲有所推弃持不可貴人遂中以蜚語坐調泗水令仲子故里民俗淳厚隆禮崇信應魯以惠愛爲治適值大侵民間食盡樹皮草子流移載道環隣邑報災自七八分至十分不等俱免徵獲賑惟泗前令以陞秩行止報三分例不爲災民惶惶無措應魯惻然痛心先將倉穀權發分賑卽條列災狀上聞其畧曰本縣先災輕而後災重初報時止於三分及收成生意空虛全不結實八月後秋霜

早降豆麥盡枯問追徵則若剝膚椎肌之苦問積貯則有十室九空之嗟問米價則斗米至百八錢問地荒則一千三百數十頃何忍晏然民上不爲請命邇來審飢之令無日不下職已釋簿書緩期會遍行鄉村按下則戶籍竭意查審極貧次貧共五千餘名造冊申報男婦老幼欣然有待哺之望聞原報三分議不爲災恐此議若行是使上有不信之令下有向隅之嘆且本府災傷重大前蒙軫念一體改折卽所折有輕重而民亦自甘心不患寡而患不均情固然也伏望俯念民艱今日賑

恤乞依改折事例與諸縣一體加賑蘇此一方之民若曰地方本無災而違道干譽三尺具在所不敢辭時上官怫然謂泗本無災而爲此言是私其民而緩其賦也移檄切責且委通判王君覆勘應魯喜曰是泗民福也非是莫驗吾言已而王君廉得其狀歎曰非公上聞泗無噍類矣於是悉列前檄所未備者以報上官憮然亟允其請先發本縣倉穀二千餘石不足繼請借府倉穀二千餘石又不足復請借臨德二倉米一千餘石猶不足仍請內帑貯金八百四十兩其搬運腳價路費官爲

處給無擾於民其給散升合分釐人沾實惠沿鄉逐村興爨煮粥委簿尉學博分方給散躬歷郊野巡視其間櫛風沐雨宿野餐塵歷四閱月全活饑民二十餘萬先是奸民具狀請勸借富民應魯怒曰如此豈惟害及富民終必殃及爾身亟碎其牘嚴法止之羣議乃息至是得請民歡呼載道猶以民困雖甦瘡痍未起益冰檠持躬豈弟敷政輕刑緩賦旌淑別慝代給行部之廚傳代將兌運之禮幣出餘銀餘穀益以俸金修縣廨及西幕廳前後堂藩司行署南譙樓署東會泉亭有本亭創兌

泉州府志

卷之四十九

明循績

四十二

軍倉於濟寧州東門外以便收發建三皇廟於城北門外東西列房十六間以爲民居備守禦修邑志設義倉開陪尾之水由汶及濟以達於河貽千百世利又修文廟及殿南戟門增建仲氏故里牌坊置祀田一頃十四畝給宗子仲銓仲則顯世供祀事復以學田租入無幾將曹科沒官田一頃四畝申爲學田敬禮士大夫以文相接以恩相孚莫敢以私干待諸生如父子復其糧役恤其匱乏且示以聖賢旨趣文藝要訣泗舊鮮科第至是門人王士禎遂登進士薦剡屢陳遷戶部主事民

呼號乞畱不得則立碑頌德建祠生祀之歷員外郎中
管倉場權關稅視太倉銀庫釐剔弊蠹嚼然不滓在鈔
關時稅璫方張爲竭力調停關無暴征璫爲戢罔得代
還部以差使過里推江西憲副未報卒於家年五十一

節泗水縣志參趙中丞撰
誌賀逢吉救荒記生祠記

龔雲致字潤寰晉江人萬歷壬午癸未聯第進士授中書
擢御史視鹺長蘆時潞府請以彰衛二鹽歸藩府雲致
力阻之故事各官朝潞府拜門外雲致移文長史以拜
門乃天子之儀不敢陷殿下於失禮王爲出朝賜宴及

泉州府志

卷之四十九

明循績

四十三

幣一如藩封例復按淮陽使道抵家爲言者所論左遷
兵部出爲湖廣副使京察轉汝州守遷雲南僉事以沐
鎮兵歸兵備致政歸家邑南泐田塘周圍三十里爲田
八千畝有奇歲久塘淺岸圯雲致自汝州歸時請於邑
令顧士琦履畝開濬頗有成績未幾趣任之滇歷一紀
堤岸復崩陂塘成野雲致旣歸捐貲盡築以石費幾三
百金斗粟銖錢不及鄉民又慮暴雨水漲一陡門難以
驟洩就橫涵直圳增設澗二間葺土祠春秋告祭士民
歡欣歌舞請莊際昌爲文勒碑紀績焉

通志參霞
棲藏藁

林寅賓字爾亮號述源晉江人萬歷壬午癸未聯第進士授行人三奉使禮儀卒度問遺盡卻擢廣東道御史以病告起補山東道御史巡按宣大兼督學政閱視邊防舉劾不爽賞罰有章出納惟詳三載邊關晏如陳邊陲要務建常平倉定軍馬錢糧經制又奏墾荒田千八百餘畝免額外新糧請蠲賑以恤災傷赦宥諸疑獄重辟及貧民賦贖之不能具者並嘉納焉有以常例三千金進者封還府庫不入私橐報命行李蕭然還朝勸帝勤視朝親宰輔召還斥逐諸臣時論躉之出爲廣西叅議

泉州府志

卷之四十九

明循績

四十四

分藩右江會有岑溪之役籌策安撫中外帖定卒於官年五十三寅賓出言安定舉止軒徐少失怙事母至孝爲諸生苦學涉世和夷無競衣食約素絕奢華李廷機稱其廉靜恬寧有古君子風葉向高稱其居官矯矯不爲循名輜車所至功實並茂其推重如此

李光綬字宗英號心符晉江人光縉從弟萬歷乙酉第六名舉人授長垣教諭召諸生月爲文會三品定高下剖析疑義旁郡邑士爭就學癸卯獲雋五人前此未有也捐修衙齋構一枝亭書帶軒環樹苜蓿千餘畝蓄圖書

其中吟嘯自適爲文紀之三年擢國子監學正李湘洲公爲司業凡雍試文悉令校閱首拔烏程沈聖岐是秋卽雋京闈晉禮部司務長安市火且及官署躬率僕隸撲熄之得無虞奉差歸連丁內外艱起補故官陞戶部陝西司員外邊士索月餉急且脫巾司徒仰屋莫應光綬指畫緩急請移他給倉庾暫予之得不譁部故有關倉序差每鬪捷矜得光綬獨讓處後于役渾石橋事竣復餉士昌平抵白溝河疾劇卒年六十五光綬修幹廓落與人交傾洞肺腑而不能奔走逢迎遇利若驚囊無

泉州府志

卷之四十九

明循績

四十五

一絲之積卒時孤子皇皇附身無具斂以絳紗袍縣尹王則古臨視歸發篋中紵易之成喪率僚屬拜奠涕泗

如雨

採雲臺
藏稿

黏鍾崑字子瞻晉江人燦從姪萬歷乙酉舉人爲眉州學
□□入學贊儀署丹稜縣前官取帑金百餘去吏白當發其事鍾崑補以餘俸更署眉州追徵例有糧戶分頭二千餘□鍾崑故遲之俟徵過而後署任擢知安定邑民逃亡過半鍾崑極意招徠三年成聚每書勅兒曰善自治生我不敢以百姓脂膏爲若等資斧也卒於官

閩書

許鳳賓字瑞夫號南岡晉江石龜人萬歷乙酉順天舉人授香河教諭學舍傾圮捐俸佐修謝贄卻餽秋毫無取同官馮姓疾其廉形已語相侵受之怡如會馮病脹家人避匿鳳賓親摩其腹爲具禪裊衣衾馮流涕曰今乃知公盛德君子也扶服率穉子少妾羅拜謝兵使者顧公憫其貧委署楊村鎮揭金充過客費顧曰是甚若貧也聽其歸復委署香河縣利弊久悉興罷悉中窾先是令自起一歲賦幾爲例除去之民大悅前後直指六疏薦擢隆安令地隣土州交趾遷徙不常錢穀僞匿莫可

泉州府志

卷之四十九

明循績

四十六

究詰至則與民更始文以禮教革火耗搜衙蠹招流移墾荒田除埠稅濬河渠義廩社學鄉約保甲以次第舉單騎行鄉亭問民疾苦冠婚喪祭頒布儀式俗翕然丕變邑賦不滿七千富豪弊匿專責貧民爲履畝查籍搜漏米三百一十二石漏丁三十九口漏銀三百五十九兩零賦清而民樂輸尤愼停讞檢勘雖盛暑必親蔡光彥屍頭爲賄換經兩檢委鳳賓覆從腦後與頸骨交處分寸大小辨悉其奸林正寅爲嫡妻奸夫所殺其妾亦有私嫡委罪於妾隣里一詞廉其情于土州得嫡奸夫

置之法江多盜有盧大智者出沒剽劫伏襲斃之杖下石山陬有羣盜禦商貨商人拒之盜傷死十三人盜入告鳳賓署其狀曰此必聚盜致死敢有乘機劫掠罪如律遽監告者盜叩首服辜葺學宮建魁星樓進諸生爲講文藝月親考二會考四邑久無科第是歲林大佳郭之桂並領鄉薦人侈爲盛事中貴權稅粵西責縣令叅謁如司道禮鳳賓率諸僚長揖中貴怒與論稅事侃侃不阿中貴嚇之曰聞隆安連接土州百貨必經地多產原有埠稅誰乾沒者正色對曰爲朝廷官撫朝廷百姓

泉州府志

卷之四十九

明循績

四十七

無例而稅有例而沒是欺君也所不敢爲生平辛苦僅博一令不思豎立但利銅臭是污己也所不敢爲聲色俱厲中貴語詘議遂寢而心銜之矣竟以稅府故與爭委官云畱郵書四發目不交睫者匝月憂勞成疾背瘡盛發卒于官囊空如洗不能製殮具僅用舊衣數襲士民巷號道哭罷市三日上官厚佐其喪柩出蒼梧復爲中貴修郟奪去靡有子遺櫬歸子孫饘粥不給所著有易解論語翼說談經綸紛等書

採景璧集

陳鳴華字誠甫晉江人安子萬歷丙子經魁丙戌進士初

選戶部主事權九江關時吳楚不熟商舶稀少鳴華慎稽核剔蠹弊節省浮費以補正項稅卒如額督盧龍餉槩量維均給發必時轉主客郎中遷廣東提學副使擢湖廣叅政過家省覲屬父疾革服闋補選爲蜚語所中左遷叅議備兵荆西值沔水泛溢度形勢增堤堰躬畚鍤民免其魚楚中有倡爲假王者宗黨以撫臣寬縱毆而殺之命鳴華與臬司定其獄鳴華以事關天潢網不宜密釋其株連者二十餘人遷江黃副使改授鄖襄上疏乞釋膠牆禁錮爲楚中主讞者所擠遂請告家居以

泉州府志

卷之四十九

明循績

四十八

詩史自娛年八十一卒祀鄉賢子炳奎恩貢官知州孫

豐陞舉人官通判

雍正舊稿

蘇舜臣字哲甫號心竹晉江人濬從弟隆慶庚午順天鄉薦萬歷丙戌成進士第後守銓戊子分校順天鄉闈有以私囑者峻拒之入棘得其試牘閱而擲之囑者偕爲同考復申前說及他房搜遺卷以薦舜臣執益堅竟棄去授刑部主事讞獄多平反先是有主獄者擬大辟亭之法未當舜臣驚曰誤也幾失入矣爲剖析其疑律生出之得末減者三人時太倉王文肅公欲徙之銓部會

以疾歸起補太常寺典簿犧牲粢盛弗中選者以勢請
莫能奪也議徙部或阻之將推外補舜臣曰分定也夫
夜夢六女子戴笠來請其六安州乎命下果然六安故
膏潤地至則汰歲例千餘金雞鳴治事更闌始休爰書
一出手裁莫從高下以法繩吏以禮正俗以冰檠律身
興學作人士皆嚮風有衣冠之裔而姑婦質公庭者有
下里爲婚已納采而渝盟者召諭以禮各感悟去省贖
鍰取備穀而止貧不能贖者釋之故事民間市田非納
券金于官不得鬻歲可輸千餘金第取券印給之悉免

泉州府志

卷之四十九

明循績

四十九

其稅他如清灌田之陂新館垣之署散菜傭之豪華除
民間括馬之弊難以殫述性方不能阿意曲奉廬太守
暮金盈門舜臣但事之以禮屢失其歡蜚語相憾不稍
動竟嗾御史論劾之歸而宦橐蕭然攜二鶴相隨放之
園池中改惜日堂曰超然稍更拓之築小石山于堂南
坐嘯其間聽鶴飛鳴以爲樂晚營飛鳳岡阡以待老舜
臣在六安時李光縉嘗過訪其鄉紳宋之禎語縉曰蘇
公守吾六樸而直廉而恕于爲吏善矣如自爲何蓋言

其貧也

採景
壁集

傅慶貽字有積號積所南安人萬歷丙子舉于鄉丙戌進士授番禺令公恕廉明催科不擾盡革羨餘贖鍰毫不入私一切輕生圖誣匿名告訐及以盜扳良槩置不問一日偶出聞有號泣聲羣惡少咆哮于內亟入爲驗狀無他歸卽判牒開釋民有貧不能養而父訴其不孝者捐俸給之父子感泣丁內艱百姓攀號行越日忽有伏謝舟次以織縞十餘束爲從者資叱之曰吾爲若父母寧任若德耶其人叩頭哭不起爲受其一以當劉寵錢民勒石誌思除喪補宜興張弛惟宜民歌豈弟以矩方

泉州府志

卷之四十九

明循績

五十

失貴人意調陽春旋調繁高要擢南戶部主事二月出榷北新關嘗語人曰凡官當以精辨爲職獨榷關者不然須存得寬一分意思乃可咸頌爲仁人之言在宜興應南幾分校所取士率名流如相國何公如寵其最著者也番禺陽春二縣俱祀名宦本邑復祀鄉賢

南安志
參廣東

通志

鄭得書字子讀晉江人萬歷丙子舉人丙戌進士授大名令賑恤孤寡輕賦慎獄禱雨雨至拜火火滅邑稱神君當道屢欲調繁謝曰三輔無弱邑武城雖小絃歌難耳

臣子鞠躬何地敢擇郡守尹公曰長者也擢戶部主事卒官得書恂然謹讓軌律孝友爲孝廉時里中先後回祿出粟授衣三賑之無子不年士論惜焉

閩書

陳濂字道源惠安人叅政睿五世孫萬歷壬午舉人丙戌進士除易州知州至官出文諭民當職寧無强悍之號而不敢察淵束薪寧安迂拙之習而不敢媵媵渙忍寧乏赫赫之稱而不敢獵聲賈譽則省災傷革冗役平獄訟禁礦洞置學田裁里甲行條鞭置囚糧處社穀革社夫一意爲民遷刑部郎復補戶部倭寇朝鮮朝議發東

泉州府志

卷之四十九

明循績

五十一

征軍助之推擇濂主餉濂當軍興飛□捉衿見肘之口借筭握算寸心幾嘔疏乞罷開礦罷□珠復疏專委任重老成以裕財用東征事竣乞早撤師省餽餉並蒙嘉納遷肇慶知府嚴保哨而萑苻無警折中使而開採不疲潔清自守不以法假人小民利病若加諸身期暢達掃除爲快培士類課文藝癸卯登賢書者九人擢廣東□使叅政定稅額以通商簡材官以飭武弊政一更晉按察使濶夷啓釁恩威撫諭片辭効順兼掌數印日夜治文書敏練不怠晷刻之間八面沓來諫然中理屢推

陝西貴州布政使以勞瘁乞歸修祠宇卹宗族有司罕

識其面尋卒著有薜蘿小草

閩書叅廣東通志惠安志

李仁字靜甫號一泉晉江人七歲日誦百餘言稍長習易旁及諸經家貧不能購書每向人借觀或就書肆一覽輒成誦有欲試其才者與經義百期片晷歸如期歸之隨叩無遺易時中倡明虛齋易學從遊百數獨器仁補弟子員嘉靖戊子舉於鄉五上春官不利而父歿萬里擗踊哀痛幾絕謁選得惠州推官惠民黠吏奸仁以法繩之期於平允獄有非辜者雖先後累牘鍛鍊已成必

泉州府志

卷之四十九

明循績

五十二

暴其冤直指檄勾稽諸主藏吏潮州多侵牟邑尉恐陰遺金繒求脫立卻之按如法直指至惠其所親者爲奸利仁白之直指意動若陰爲地者仁持之急直指不懌私語郡大吏郡大吏以下爭賚酒錢相問絡繹仁不少動曰吾愛此三尺遑恤其他直指嗛之會委仁督運盡卻規例直指初謂督運非理官任欲藉此報罷之已按諸故事舟車費入可八百餘金仁無所受乃歎曰司理眞清白吏吾過矣適郡乏守遂委仁署盡罷諸不便者博羅有良民數十豪家誣以剽剗吏文致之坐大辟仁

訊得其狀白當道盡脫之興寧饑發倉捐貲以賑己西分校棘闈所得皆佳士擢戶部雲南司主事值邊警索芻粟立辦轉餉如流無後時委視京倉會緹騎陸炳勢熏灼門隸蠶食倉中取利一啓倉輒譁而入仁怒曰若何官從而敢闌入廡中以緹騎對仁曰吾知有法耳立柱之陸大恚然亦不能有所加於仁□督孫亞卿欲私其里人委之監收仁白與例相左孫曰何例也吾所可後卽爲例耳仁持益力卒如例一運官上歲餉不如格治以法則出孫書爲解仁弗啓曰總督安得有書僞也

泉州府志

卷之四十九

明循績

五十三

三尺法吾與總督共之誰敢私者孫益怒遂以蜚語聞大司農素知仁委令散鹽南圻命下而疾作卒年五十囊中僅書數十卷衣數襲授妻江氏曰以遺吾子令讀吾書時設吾衣足矣仁純白不緇峭直自守素不問家人產祿入供母甘旨餘盡畀之兄弟及族戚貧乏者邑

中以孝友稱子光縉

閩書叅蘇紫溪撰誌

金時舒字邦泰號鳳池晉江人萬歷己卯舉人已丑進士授大理寺評事以仁恕佐主者平反亦時時袖律爭之曾雪一大枉獄脫十八人于死轉戶部主事甲午典試

山西盡搜四寨五原之奇承重丁繼祖母艱起補原官
監兌江西遷戶部廣西司郎中冰檠自持驗糧給諸衛
士驗收商貨應時無滯所至德之時礦議方興權璫所
過輒斥辱有司福山令韋公衷芹強項與抗中以蜚語
必欲陷之死地時舒銳身救解且多方借力焉韋卒無
恙人服其膽識出爲鳳陽太守釐弊剔蠹纖悉不遺葺
學舍購經史選五州十三邑俊乂肄業其中殷勤提誨
糊名校藝親定甲乙多士奮興大計矢公矢慎有一州
牧爲當事所憾咸檄中傷之時舒薦其稱職數往還力

泉州府志

卷之四十九

明循績

五十四

辨竟得釋無何以忤韓弁構卻歸復起撫州守辭不赴
未幾特授潮州守治行如鳳有亂民自號散帝連年擁
衆沿劫海上累捕不獲時舒以計縛巨魁立散其黨紅
夷闖澎湖島不利入寇潮州值霖雨城塌二十餘丈夷
視耽耽市井無賴從中應之時舒支以木柵濡綿寶爲
垣冒風雨宿城上以計縛私與夷購之吳姓把總殺之
絕其嚮導訓練一軍屹然不可犯夷竟讐遁潮民安堵
直指沔陽沈燕雲行部至惠遽反曰潮有賢守矣何以
至爲凡殿最可否一以時舒爲憑未幾擢按察司副使

備兵惠潮簡閱搜討不少假借僚屬凜然兩廣鳳岐戴公借籌征交之策獲奏捷敘功賜金繼而有賫捧之命未行前一日猶力籍巨款于典人莫不稱快服其神明還抵家丁內艱營喪葬修祠墓置祀田族人有貧而鬻女他郡者贖而禮嫁之買地附祖墓傍爲義地以待族之貧不能葬者服闋遽卒於家年六十有四潮人立碑

紀德祀之名宦泉亦祀鄉賢

採黃東崖撰志
參潮州碑記

潘洙字士鼎號鵬江晉江人維岳姪萬歷戊子鄉薦第一己丑成進士既掇上第以學未優俛就廬州教授其教

泉州府志

卷之四十九

明循績

五十五

士如家塾師弟子遷國子監博士陞工部都水司主事權杭州南關稅足額外羨金八千有奇悉貯藩庫亦不以報部管臺基廠每收放商人至不費一文遷吏部主事歷員外是時神廟求多吏部臣在任在籍者悉奉旨逐去畱者僅四人洙與焉以父病乞假丁父艱服除仍補吏部掌考功以思母請假歸久之起江西叅政兼理驛傳復丁內艱起補浙江叅政備兵嘉湖爲德於浙西人甚厚歷遷廣西按察使江西右布政廣東左布政卒于官洙莅官所至不攜本土一物不妄取民間一錢久

居家日見窘迫及出山復然爲人一直如矢所至與諸公相處始初猜訝之後乃盡親厚當官事事理會嘗謂人曰令吾子弟作文如我爲官者何患不得高第耶臨卒時遼東告急日夜擁衾嗟歎積有三十金欲以助遼餉及歿當事者以賻其喪所著有史漢三蘇選約書閩

蔡獻臣字體國號虛臺同安人浙臬貴易子萬歷戊子第二名舉人已丑聯進士授刑部主事時帝久不視朝抗疏請定國儲忠愛懇切言人所不敢言諸所讞理一歸明允司寇王元美稱爲用世才調兵部職方主事推補

泉州府志

卷之四十九

明循績

五十六

將弁惟才遷禮部主客郎中四方朝貢一依典制調儀制司郎冬至習儀臺省爭班獻臣力執舊典復論楚藩假子一案忤右宗伯意宗伯遽罷深頷之已又疏請福藩之國鄭貴妃恚甚夜發內使執之曾不少屈及旦以舊典爭於帝前帝心嘉其直遣出常鎮叅政旋遷湖廣按察使有爲宗伯修憾者借楚事叅劾削秩罷歸百姓遮畱立祠尸祝抵家讀書東山修輯邑乘尋起浙江海道陞浙省督學天啓中擢光祿寺少卿歸而樹德於鄉邑有海豐庄田受產二百八十餘畝上有朱埭一決則

下貽患於海豐屢築屢壞訖無成功獻臣慨然董其役第田爲三等曰崩流田漫漲田沙壓田以次出貲凡築石岸千九百八十餘丈於是朱埭歲以有收而海豐田永保無事農人業戶頌功無旣請何喬遠爲文銘之勒碑紀焉所著有清白堂稿仕學潛學講義筆記等稿年

七十九卒贈少司寇

通志參

同安志

黃華秀字居約同安人入南安庠萬歷戊子己丑聯捷進士授韶州府推官逮下仁慈事上端執精明決斷雪殺姑之冤釋代兄之囚辨伐塚之詭以最薦召爲南京浙

泉州府志

卷之四十九

明循績四

五十七

江道御史剛果洞達條陳時事時東方有遼左之慮中原有礦稅之興楚藩有小人之構華秀皆上疏極言之官暇從德興祝世祿寧國張應泰潛江歐陽東鳳及郡人李范廉駱日升爲讀書之會相切劘如諸生卒于官不餘一錢諸公經紀之

閩書參同安志廣東通志

李伯元字端統號宗古晉江青陽人萬歷戊子舉人授長樂教諭日課月試捐修學宮祭器擢房縣令地瘠民貧修舉頽廢督諸生興業勸農桑輕賦役重保甲恤孤獨斥羨金蠲贖緩凡上供歲儲如期如額而民無苛斂復

改修文昌閣爲尊經閣因揚子山有殺越者重葺古剎
建公館拒僧居守以防奸剖三疑獄上官署上考忽遭
採擢中璫之擾初檄稅閒架量鳩每舖月錢一文積至
三金應之大怒蹴地伯元不爲動復檄採礦又以括積
餘遣兩贖官來闔邑震動伯元曰無恐有我在南巡無
礦又搜帑中久腐並傾俸湊與之是時璫螫甚第云羈
候露章旋聞母訃上官憐之擁護微服洗橐歸會璫被
逮乃免復補眞州眞亦有璫兼前政廢弛積案積蠹戴
星迎送關津以閒治事日畢案牘數十歲補庫蠹九千

泉州府志

卷之四十九

明循績

五十八

重建東西庫鑄收支法以貽後人修學宮經閣名宦祠
正祀典建社塾及敵臺樓修馬神廟來鶴亭朴樹灣褚
家堡公邸百廢具興費不及民凡庫饌郵供故事一切
罷之再試庠士多得人諸臺使皆最剝而耿中丞署其
考曰昔馴方張之虎今理已焚之絲節比羔羊祥同鸞
鳳擢景州守衝途如眞歲苦旱蝗禳禱募捕蝗亦隨息
修學浚泉建亭及董子讀書臺四城周垣景賢樓慎儲
倉養濟院因襁蝗重修漢眞將軍墓祠各手記之前守
爲隣僚所中羈訊未歸陰爲解釋諸隣封亦輯睦無差

池二年丁外艱歸以在眞時鞠一庫椽遣戍赦回者造
貝錦飄然歸建家廟增祭田築斗室披閱圖書念高祖
木齋聰周易外義湮沒無傳銓次晉峯隨筆著易鉢一
部纂家譜青陽志諸集濬塘以備旱衆欲伐石紀庸卻
之卒後青陽敦請祭於社與木齋晉峯並祠

採李鹿
巢文集

林喬木字爾臣號華麓更號中升晉江人萬歷戊子舉人
授莆田教諭卻贄餽周貧士有黃生獨以藝稿數首謁
喜爲評隲有一生受他嗾幾中奇禍爲力辨得白後俱
穎脫莆人無不頌其善訓士且愛士也丁酉分校雲南

泉州府志

卷之四十九

明循績

五十九

所閱禮經卷無多而薦牘爲最典試者復以他經委焉
故名士多出其門擢長寧令新 文廟創祭器月庀飯
課士貧不能娶者捐俸助之寧士斌斌向風文翁之化
不是過也丁內艱扶櫬歸廚橐蕭然寧民思之起補新
城令繁劇視寧十倍喬木曰吾與江右夙緣哉向彈琴
今戴星矣其恤窮黎獎士類不異於長而剔蠹蠹樹冰
槩有加焉於是革兌漕常例絕諸生關說清稅額逋負
平其法馬兩造但令輸情積穀外不取鍰金故事清明
節屆薦紳孝廉郊祭向郵中借馬嚴禁勿與驛遞始清

先是長寧有推官以查盤至見喬木不能阿奉銜之至是遂中以蜚語解組歸士民遮道車爲枳抵家杜門不出念母陳氏貞節未獲旌揚未邀封典黯然神傷年六十六卒有子繼殤宗人以弟子甲春嗣焉採黃九石傳誌李衷一

鄧鑣字道馭晉江人總兵城子萬歷己卯舉人已丑進士鑣少豪伉治諸生業久不遇讀書清源山之半嶺巖丙夜不休故治毛詩夢以禮經奪魁遂改習禮凡三十九日得雋既登第授青浦令爲折糧法以均田賦濬河渠勤課學徵入爲戶部郎坐爲令時失旁邑貴人驩調歸

泉州府志

卷之四十九

明循績

六十

善令政尚廉簡催科得宜改建學宮築天泉書院率諸生講學文教大興擢南戶部郎出守南陽郡連水旱民流徙不支請捐帑金三萬賑之卒官鑣爲孝廉時張相居正大毀天下書院郡故有羅一峯書院令欲毀之鑣與令書萬餘言卒勿毀閩書叅廣東通志惠州府志

陳廷詩晉江人萬歷戊子己丑聯捷進士授遂溪令寬裕愛民建月城修公署民咸安之崇禎六年士民上其治

蹟祀名宦

採廣東通志

曾偉芳字君彥號蒼巖惠安山兜人萬歷戊子己丑聯進

士授刑部主事熟讀律例讞獄精詳有武弁某當論死廉出之時有事西征陳建儲防漕二疏司寇薦其有邊才改兵部職方司條上朝鮮善後事宜陳島夷不可封貢狀差察寧夏定叛功次驗軍籍覈戎政指揮某受賕豁軍摘發之中貴爲居閒同舍郎及大司馬又爲中貴請卽欲拚一官廷劾之三殿工作中貴求多役軍藉得乾沒先持金五十爲壽正色卻焉出典廣東試道出江西有持金六千暮夜道旁求關節者立時擒治奏聞旣報命則軍政事興於諸衛所官廉墨能否素已詳核至

是舉劾悉當奉使南都途擢武選員外郎足未履署會兵科請斥軍政漏察者若而人帝移怒兵部他事問兵科臣安在兵科武選長謫小吏餘皆鐫三級並遣逐臺諫部幕四十餘人偉芳在鐫級中坐謫賓州判人稱其冤冒暑赴任地近瘴鄉蒼頭多病死偉芳獨無恙反爲煮粥飼之曰吾卻病無他方自製澹然一丹而已尋放回初偉芳在刑曹得交李孟誠於獄中及歸孟誠正戍閩相與講明性命之學而以鄉約保甲行其東海上書善紀過訓誨痛切人遵其教鄉邦桑土之謀耿耿杞憂

言於當事莫不信從天啓初錄用舊臣列名封事而芳已卒年六十有二後贈布政司叅議所著有西行漫草燕遊筆記寧夏紀事諸集

通志叅惠安

何居穀字師稷號心田後更心赤晉江人萬歷戊子歲貢授大興縣丞縣堂遭回祿屢易令不能構編蘆席以聽事至卽捐俸改新之異時丞倅但希上官批發伺暮夜金自潤居穀一切鋤去之訊鞫務期當情不多贖緩迎上意扶人不溢十楚奉委代中貴權稅恥而辭去強之乃行期無失額而止商人德之秩滿御史疏薦擢楚雄

泉州府志

卷之四十九

明循績

六十二

府通判職司督糧革常例清積蠹正夏秋稅糧之額出納親自支放軍有實給吏無乾沒條上兩臺並報可軍士請勒石爲後規署鎮南州愛民造士修學宮置祭器購經書鎮南人士祀之名宦歷署府事白鹽井提舉招流移以實戶口闢土田以墾荒蕪稽逋負以完賦額講六諭以興禮教饒積穀以備荒歉在在見諸施行後太守至共事數月見其優于文學明習吏治凡事必諮決焉自藩臬而下邑長而上莫不深相得故益發舒其所欲爲政聲四起士民信而愛之三年擢霑益州居穀長

于勾股之法履畝引渠之事所至多改作營繕至是建
大士閣于雁塔峯前蓋呂真人樓于城東山蜚語中之
竟以大計歸天性孝友事母丁氏先意承志視從兄弟
如同胞內宗外戚周卹殆遍年六十九卒景璧集參
雲南通志
丁日近字光元號午亭晉江陳江人梧州守自申三子萬
歷己卯順天鄉薦己丑進士授鄆城令邑小而當孔道
早澇頻仍輪蹄旁午民不堪命下車詢疾苦亟白監司
使者通融協濟而以身任怨力格其冒濫有中貴橫捶
郵吏尼其八騶不得發窘甚乃更爲好語相謝僅得出

泉州府志

卷之四十九

明循績

六十三

境過客聞之曰是嘗挫橫璫者亟約車徒去之郵傳始
甦舊時攤權稅卽米蔬負販不免橫索爲酌惟正緩急
以時受徵諸瑣細皆條罷士椎魯少文購書分授之而
課第其甲乙文風漸振吏胥懾其嚴無所恣乾沒稍造
蜚語而上官有望者概不應或諷其宜稍委曲日近曰
吾安能媵人媚人乎旣而直指疏上不能別有指摘惟
以南人宜南當量調遂改應天之高淳再試爲吏事益
習而意在利民民有腴田八千餘畝淪于湖歲苦賠輸
爲詳豁之諸生貸官廩四百餘石貧不能償盡請蠲除

焉胭脂河承宛歛上游諸水而天生橋縮其瀦洩歲久石圯噎諸下邑滙爲巨浸高淳尤甚前令議疏鑿皆以費鉅莫敢任日近躬履荒度條上便宜且曰有如不效請以一官謝百姓臺使報可士民旣信嚮莫不子來恐後復親詣露宿拊循之畚鍤雲興且濬且堰逾五旬而竣役糜金錢僅前議之半臺使喜詫曰此鄭白手也於是更議城淳會遷南戶部江西司主事而止以次筦權淮上剔蠹除苛不屑屑銖兩商戴德而賦亦集受事三月餘病遂投牒不待報命徑歸抵家則爲仲兄贖故業

泉州府志

卷之四十九

明循績

六十四

新祠宇恤宗族歸六年而卒年五十二

採河千集

郭日烜字宗實號旭東同安人萬歷癸酉舉人己丑進士授嘉定州牧歸奉母就養州轄六邑故稱善地有坊里之供酋長之金又有諸稅之貯州帑者歲可得三千緡日烜槩謝卻之會免差不靖率督兵馬招討收捕擒獲六邑藉以安堵尤勤造士而精藻鑑試州邑庠首王公毓宗後爲宮坊著聲乙卯分校得士九人四標甲第洊任甫年餘循聲播川南獨以執法不阿屬員縉紳不無齟齬壬辰計後臺使有拾其短者主爵意難之而重違

言者乃量移安寧州牧覲行畱子奉母嘉邸至是母念歸急乃溯江入楚而日烜及長子基迎之荊州跪請母前欲乞養歸母不可日烜不忍別母奉與偕行至龍津卒年四十八僅遺圖書數卷周身幾不能備

採清白堂稿

陳基虞字志華號賓門同安人萬歷己丑進士性孝友戇直寡諧初除蕭山令以忤津要左遷移南雄府推官有橋榷歲入萬金力辭不染署篆新會稅監負嵎徧爲蠹尾士民大變基虞保靖之辨首盜諸家冤誣活數百命前令鈕光斗附璫虐民增重餉急催科基虞悉心調劑

泉州府志

卷之四十九

明循績

六十五

民賴以安代之日焚香臥轍道擁不前與袁王二令並祀三賢祠晉南刑曹郎有貴人欲軋一異己者基虞堅持不可乃得解歷守三郡人多去思刺彰德時畿輔猝警大中丞范景文戴星入援基虞措置軍需咄嗟立辦朝野賴之擢粵東兵憲終以不媚權貴得調捐金倡修長興第三橋行人賴之卒年七十九

同安志參廣東通志

柯鳳翔字志德號桐岡同安人萬歷戊子第四名經魁己丑聯第進士授刑部四川司主事尋擢員外陞郎中出爲平樂守丁內艱服除補贛州府守調慶遠守擢兩浙

都轉運使以年老罷歸鳳翔坦衷質貌不矜名不藏機
行己居官兢兢不爽尺寸其爲刑曹多所平反法所不
可者雖權貴居閒不稍動三綰郡符持大體不苛細至
爲轉運則齟齬剔抉殆盡而守贛時亦辭權務不染指
以故虔人愛之粵夷懷之浙商頌之第以不能屈意狗
上官計吏歸抵家居墩柄里第不入城市不乘輿張蓋
脫巾曳履莫知爲貴人也天性孝友嘗斥五百金置始
祖祠及祭田族中饑寒者濟之意氣窮交始終綢繆卽
相背負不問藉以殯葬者六七家少年凌侮者不求報

泉州府志

卷之四十九

明循績

六十六

窮人負債者不責逋童僕有過怒而譴之不加撻能改
亦納之一錢尺土未嘗有利於人卽操卷求售者必饜
所欲去年七十九卒崇禎四年學使者何公奏請崇祀

清白堂稿參
同安縣志

明循績十一

陳翀奎

陳振揚

洪有助

胡明佐

蔣光彥

蘇宇庶

郭夢詹

郭長發

蘇懋祺

何夢駿

吳宗周

蔡立愛

杜應楚

戴廷詔

陳亮采

陳瑛

林應翔

楊萬廉

洪啓哲

陳秉正

林欲棉

張賡

黃翼登

陳應堂

蔡增譽

邱應和

泉州府志

卷之四十九

明循績

六十七

林夢琦

黃琰

林廷雲

鄭際可

陳穀

蔡立敬

黃淳中

翁日躋

李寯

蔡鍾有

洪纖若

蘇懋祉

蔣芳鏞

莊毓傑

李佺臺

郭如楚

陳翀奎字箴葦晉江人萬歷辛卯舉人授祁門知縣革蠹

清逋歲潦助賑請蠲時征權例繁言利者察及埠壩乃力爲條陳山邑得免征在任七年陞安吉知州去祁門人立祠祀之

徽州府志

陳振揚初名存亮字時通號清波晉江人隆慶庚午舉人萬歷壬辰成進士未第時授歸化教諭課士論文以禮化俗捐俸建宰牲所自著仁術堂記請復憲綱教官揖立無跪伏辛卯應聘浙闈拔六人皆名士及登第授分宜令貴族橫行奸吏窟穴至則剔弊除蠹執法無貸請託不行競中以蜚語調高明令執法如初訊獄得情猾

泉州府志

卷之四十九

明循績

六十八

賊斂跡歲徵如額而止省耗頭千餘金民咸德之集諸生講學月課之三賞識王佩稱其文堪壓省捐俸給燈窓費丁酉果掄元適有奸人何慶雲何迪之士公發其奸繩以法二奸巧播流言上官惑之士人憤白御史御史怒不解振揚爭益力二奸竟從末減考滿遷南刑部主事爲御史所論謫江西布政司經歷未幾遷杭州織造通判隸中貴先是見必折腰振揚獨直躬抗禮中貴孫稔其名顧加禮焉是年解御衣故事上用舟關無畱行則多攬商人計權稅水腳費中分之悉爲嚴搜斥去

擢寧國府同知事簡而執文請益者盈門悉爲品題所賞拔多獲雋聞一再署郡邑不勞而理先後七膺薦剡秩滿陞南戶部郎中奉差過里事竣還京道中擢瑞州府知府便途赴任以節省便民爲務郡運本色米多逋負高安尤甚民賠累傾家官坐褫罰爲申詳奏准改折民若更生上高丞貪墨不法召讓堂下立遣歸一郡凜然出久繫獄數十人申擬發遣倉故積滿無空廩創建新廩以備查盤官吏得免賠折正德閒兵使周公捍華林劇賊死于兵祠廢捐俸構新祠爲文以記瑞有二城

泉州府志

卷之四十九

明循績

六十九

二門相距以形家忌復捐俸更葺之請老歸百姓攀轅不能畱振揚篤嗜經書性理及宋儒語錄爲文沈質不事鉛華居官樸忠自矢不能阿奉上官意歸家閉戶讀書無聲色絲肉之好無池沼臺榭之觀角巾方履出行市中莫知爲郡太守精星數談祿命多中所著論記尺牘若干卷藏于家

採景璧集

洪有助字懋遜號遜齋南安人徙居晉江萬歷壬辰進士授南安府推官高潔明敏鄰郡皆以訟質嘗攝大庾南康二邑清洗宿弊立收徵串票之法無重追虛納增減

之害復擅文學郡邑士人多師之入爲工部郎守廣州以艱歸服除補徽州徽名爲大郡地廣人稠財力所轄易動難調有助安靜撫之治徽三年口碑載道郡人方伯范涑以清節聞稱有助不置口大猾周道明募無名內闖沈繼先假勅煽威所在騷轢有助廉其狀以聞不報竟置之法遷廣東副使興釐不懈方有徽州卓異之旌而有助卒矣有助篤倫常厚故人當官守法持節而遇親舊不失恩意物論歸焉子啓烜戊午舉人閩書叅南安志

胡明佐字良甫號拱柱同安人萬歷壬午舉人壬辰進士

泉州府志

卷之四十九

明循績

七十

授南城令爲政不事粉飾不求名譽癸丑洪水淹沒萬家瘞亡恤存民沾其惠建太平橋爲民利涉縣多莊田賦役苦累明佐力請編運行均糧之法著權宜永猷二錄後人遵行民賴之調宣城令礦事起璫悍莫與櫻明佐爲陳地妨顯陵右臂璫懼謝去一邑以寧陞計部出守循州有巨盜出沒惠潮設法平之累遷山東叅政以不媚權貴歸宦囊雖淡分產子姪無異視施義塚置田與鄉人輪祭人稱爲古直先生卒年七十三同安志叅撫州府志

蔣光彥字有崇一字九觀晉江人萬歷乙酉舉人壬辰進

士授江山令除溺女錮婢俗弊立追徵便民法有繫莫赦者值歲暮悉遣歸屆期皆自入獄治北新關築九清石梁復造鹿溪浮梁費可三千金皆捐俸不費公帑橋成有二鶴巢其上邑人祥之入爲戶部主事出知溫州府慈祥豈弟尤敦風教祠四賢以樹士林之的森鄉約以作黎庶之坊善政表著郡立專祠祀之追並王謝擢廣東布政司叅議分守海北海南道時交黎蠢動督師渡海征之撫勦兼施衆黎畏服議者謂殊類反側靡定難以推誠光彥終不肯殺降冒功全活無數以是忤當

泉州府志

卷之四十九

明循績

七十一

事遂拂衣歸養子德璟德瑗

閩書叅
州府志
溫

蘇宇庶字嗣諧號眉源晉江人萬歷辛卯壬辰聯第進士授旌德令里役苦解鋸用吏代之取火耗爲水腳及吏行資後縣遵用之有訟者令其親識和處不從則面諭使心服催科預爲期不如期者書逋數揭其門愧之終不令隸卒下鄉精於鞫獄張胡二人爭佃胡誘行乞至家醉以酒擊死之翼日張過胡門胡兄弟與爭毆遽出死者於門外謂張斃之張不能白誣伏居數月稍露而終不得死者名字庶將胡兄弟隔別研訊誘而誤之竟

得主名張獲釋有蔣鉞向老娼索負鬩成仇娼賄賊扳鉞窩家云於鉞家得首飾數十復賄失主實之鉞坐論辟屢訟冤耿中丞委宇庶訊之詰失主曰貧人何多首飾曰小人有母有妻有嫂有妹合之故多曰四分之孰爲母爲妻爲嫂爲妹其人如言謬分之則曰吾將亂之召爾母妻嫂妹來物色則何若失主詞窮乃吐實而蔣冤雪有沈姓貸潘中貴三百金無還意中貴率僕逼取之時天寒甚沈夜半令一僮奉冷酒於中貴僕以怒之且曰彼怒必毆中貴僕果怒毆沈與妻弟趙禮突入滅

火擊死其家僮大呼中貴殺我家僮訟于官不能辯然以昏夜莫証未得論罪陳侍郎以屬宇庶辯詰良久中貴云當夜有人在彼卽召其人訊之云其夜小人睡西廊夜半趙禮來同睡通體戰慄小人問故曰毋聲某僮死矣以此推之殺人者趙也逮趙禮至知不能掩始供爲沈所使於是罪沈趙釋中貴是獄已歷十五年前後令不得決至宇庶始渙然有李直指好禪巡歷以僧自隨寓僧於山寺僧受金妄言宇庶治事不實者二字庶具二案連人送赴臺問直指怒訊竟日不能易一字憾

而思中之以此調保定改大城北方淳直無事坐理有餘陞應天通判刑部主事出爲撫州知府興學課士設法救荒清寺田築文昌橋禁革舊稅章家石稅故屬守宇庶辭去如避臙郡多盜設法擒捕朝報盜夕就戮矣以最調繁改知南昌府有翰林子殺人巡撫戒勿受狀奮然曰人被殺不受訟更受何訟有禍守自當之巡撫怒曰守辱我轉廣東副使連丁內外艱服除仍補廣東駐高州禁佐貳首領官毋得遣隸下鄉舊時隸魚肉民民多去爲盜宇庶榜示村落凡差役無本道印信腰牌

泉州府志

卷之四十九

明循績

七十三

者許村人會社綁解至則治如法高涼鹽商把持行市鹽貴而民病爲灑派鹽課於人戶禁鹽商毋許市鹽境內自是民衣食有賴盜以衰息擢山東叅政未行爲蜚語所中宇庶曰毀譽如是不可已乎螳行鵲起庶不失吾已歸遂不復出年六十四卒粵人祠祀之

閩書叅

西

江志

郭夢詹字廷璋號駟雨晉江人都憲惟賢長子也蒐獵羣書制義蔚贍不寄人籬下於會典條例尤多考訂以父蔭授太常典簿會開鐵失守沿邊文武吏多縮朒議餉

者非請帑則竭澤夢詹奏請假臣精兵三萬出關度地
結營相機長驅桴鼓矢石臣顛腦先之軍需犒享第取
給於遼瀋開鐵陷折官軍之歲額足矣臣父郭惟賢家
傳忠孝而臣妻父俞大猷先朝名將有遺書頗知合變
非敢嘗試也奏雖不行朝論壯之神光二廟繼述之際
日不暇給孝靖太后爲光宗所自出尚仍妃號而秋祭
期迫亟言於太常卿熊公曰妃禮可以屈至尊乎速疏
請先追崇而後奉慈之奠禮成熊歎曰微郭君不及此
眞典簿也晉太僕寺丞尋擢戶部主事大司徒汪公夙

泉州府志

卷之四十九

明循績

七十四

器之疏遣贊天津餉務羽書旁午庚癸頻呼與總督畢
公自嚴協心覈本折徵貴賤灌輸源源而所省存不貲
畢公檄薦稱其左方右圓擔勞任怨部覆奉旨優敘督
庾臨清簸揚必慎出納必平如父惟賢所以清南庾者
兌糧受糧皆懽去平生無疾言遽色值有手足之隱痛
爲鄉所寃又難自白夢詹奮不反戈而憾者假手御史
螫之太宰趙公南星心憫之而掣於臺劾異請念賢者
之後姑與鐫秩夢詹以手足故棄官不悔鄉評義之亡
何御史以他事下詔獄當路多寄聲乘此昭雪者歎曰

昔梁扶風不因人熱豈郭生乘人冷乎自營菟裘爲終焉計夢詹敦行孝弟與弟於潛令光詹極摯愛及諸女昆弟俸餘盡瓜分之功總三族及故人婚嫁生死緩急如取如攜丁巳歲饑疫洗橐破困以周親朋忘其力詘蓋磊落好誼其天性云

採李鹿巢文集

郭長發惠安人萬歷甲午舉人署教龍溪龍士德之爲立碑頌天啓初累遷戶部員外郎值遼事上書相國爲恢復之計出管徐州倉妖賊起山東勢且及徐長發親詣荆山口激厲材官輦米傳食併力堵截賊從固臺堡暗渡人心須亂長發登城周巡傾私橐邀援遼武弁二人之過徐者二弁皆爲盡力又以陰陽遁甲預決破賊之期賊竟敗走徐城以完徐人德之請當道求以爲本道兵備竟以大計被中後論守徐功復原官而長發已卒

閩書

蘇懋祺字子迪號修翼晉江人幼受業於李光縉萬歷甲午舉於鄉授長汀教諭丁外艱服除補樂亭地接遼海椎魯少文與多士探討六經子史及關閩濂洛諸書由是文行彬彬有士妻少寡誓守姑迫嫁之而庠中生利

其年少多金謀爲子婦懋祺召而切責之婦得完節遷
新河令邑當燕趙之衝值遼陽新破徵兵徵餉徵車徵
鐵之使絡繹四出捐俸助費以甦民困而胥役逋逃衙
署幾空乃椎牛置酒享里老勸應役民欣然効力未逾
年七登薦剡出入省儀從乘馬烈日中不辭勞瘁前邑
令漁帑金三百上官欲劾追爲措處代補得免於譴以
疾卒於官囊橐蕭然百姓賻其喪歸

通志參呂
天池撰傳

何夢駿字履悌晉江人喬遴長子萬歷甲午舉人授三水
知縣始至視庫空虛衆驚駭夢駿察椽柱蟻蛀土異色

泉州府志

卷之四十九

明循績

七十六

而鬆取土令鍛之獲白金如故額人服其識建天衢雲
路二坊於學宮前邑賦繁重又係盜藪嚴緝捕慎扳誣
追徵無羨民得安枕觀察黃又謙詣治所歎曰三水賦
法冠一方矣言於兩臺交章薦之陞常州府通判三水
民爲立碑攝宜興縣篆值編審以實產定徭役凡花分
詭寄搜剔殆盡點解則以田之多寡定解之重輕請託
不行豪右讐服整漕規而倉頭無濫收之弊援書冊而
解戶無額外之征催糧有法民皆樂輸折獄惟良人盡
允服考試儒童凡仕宦書劄槩不發緘臨考分題給卷

嚴稽懷挾倩代諸弊比榜出皆孤寒佳士爲二百年未有之事士勒石堂左紀之屬應督糧進京闔邑士民前後四起呈請畱任適以三水任內呈議降調夢駿亦以家有老親詳請解組而武進等四縣士民益紛紛保畱軍門王象恒按院王象蛟會咨吏部仍委夢駿完部糧事照所降之級於蘇松常鎮四府中改補太倉州州判以濟公事以慰衆情奏准之後夢駿部糧事竣仍飄然賦歸兄弟及諸從分俸有差建小宗祠臨歿分撥己田

以充祖父及叔祀田

採何氏家傳三吳宦蹟三縣志

泉州府志

卷之四十九

明循績

七十七

吳宗周字熙偉南安人萬歷甲午舉人授興國令澗濊二水自城北合流過縣南舊爲浮橋以濟歲久傾圯議易以石未就宗周獨捐俸經始士民爭助釃水道六結石址七長數百武廣四軌起癸丑冬至乙卯秋工竣吉水給諫鄒元標爲之記宗周入覲遷秩繼令者爲蔡鍾有復翼以亭欄楯完具雄麗稱於嶺北先是童謠曰若要龍橋興須待福安人宗周籍南安鍾有同安皆符其兆宗周徵輸有法買田數十畝以資軍黃二冊解費設白沙渡民不病涉徙官後縣中爲築長春亭志去思焉

採西

蔡立愛字忠甫號仁菴晉江人萬歷甲午舉人就銓試得高等授蘄州知州藩府麾下肉社而肉食良民者立置之法州民頌德甫五月丁外艱起補連州嚴什伍宣六諭勤誨諸生提衡吏民所轄邑衛肅然戶尸祝之踰年復丁內艱老幼攀轅勒石紀焉弟立敬

採蔡氏家乘
參呂天池撰

志

杜應楚字翹甫號鳳林晉江人萬歷乙酉舉人乙未進士嶺北登第自楚始初授孟令下車卽廉犴狴出無辜賦

泉州府志

卷之四十九

明循績

七十八

稅準條鞭罷絕一切火耗額外取籽粒不領於司會者俱編入起運額中清馬營民田匿軍屯二百頃歸正賦民饑請賑例俟部議應楚先發倉賑貸屆期所貸粟四千餘石盡來納價開豐稔支河以灌民田築小金堤千四百丈以禦水患捐貲造郭淖梁以濟往來聽斷手自批決兩造成服與士談經課藝人文日振調河內孟人與河內爭賢令持控兩年乃調丹陽覈胥吏冒金三千餘歸公金沙歲有金二百協郵向充令長應楚舉歸之郵令郵長自詣金沙關給領爲丹陽人築壩濬河具有

法度費省而功多丹陽人私爲過客往來人語曰吾邑
令開敏有施爲不徒仁慈發於心陞戶部主事丁內艱
起補原官監江南漕值吳楚大水疏請蠲賑民亦相勉
勸輸賦稍集而不厲事竣遷員外晉郎中出爲南昌太
守廉慎自持寧藩久廢而宗祿數萬仰給於郡每關支
囂凌爲誅檄屬邑如期轉輸至立給發無譁者隣郡貴
人子掘他姓墳而毀其屍篡其地獄久不決以屬楚片
言折之伏辜自是疑難大獄多委焉政聲日起而神則
日耗入計後投劾乞休當事令所司敦趣且手爲書強

泉州府志

卷之四十九

明循績

七十九

起之竟不出卒年六十應楚魁岸豐下目光如電劇談
時事踔厲風發居官則淡泊節儉與民休息不苛而理
不肅而威吏胥斂手奸猾迸跡所至皆然而孟縣人志
之獨詳爲詩歌古文辭自成一家六籍百家皆淹貫下
筆滔滔數千言立就登第時人擬其選庶常應楚曰吾
且受帝命君百里可以實自致於民異日爲肩鉅蹈遠
地何必減金馬門哉卒如其言未究其用焉

閩書叅雲
臺藏藁

戴廷詔字道階南安人萬歷乙酉以儒士舉于鄉乙未成
進士授兵部主事兼理清黃冊清黃自被火後散失難

修數月之間編輯成次晉員外郎中出叅蜀藩時土蠻爭立安氏隴氏干戈相尋廷詔入其地爲勘功罪定支派咸帖服會蜀旱大飢捐俸賑貸煮粥施給之民賴以活者甚衆瀘州舊有冤獄三案久不能決廷詔至立剖之遷江西按察使時贛州南安南康諸處皆盜賊淵藪廷詔陳防禦之畧飭守備之具與巡撫議改折議減鹽稅等種種事宜俱報可轉本省右布政入覲歸與同輩結社賦詩優游林下十餘年卒所著有詩山草家訓寶

鑑歷代帝王紀等集行于世

南安志

泉州府志

卷之四十九

明循績

八十

陳亮采字惠甫號希唐晉江人萬歷戊子舉人乙未進士歷刑部郎中出守台州轉湖州均田定賦毋俾隱匿富室先有謗言久乃服調萊州守廣設學田培養士類舉卓異擢山東兵備道所至廉幹有聲轉粵東叅政調山東登萊道陞浙江按察使以親老乞歸

通志叅浙江通志萊州府志

陳瑛字時聘晉江人道曾元孫萬歷辛卯舉人乙未登會

試第四人第進士令崇仁錢塘歷南工部郎知順德府調大名遷浙副使調山東提學副使皆以繁調擢常鎮叅政以親老乞歸養越五載推起叅政山東尋備兵安

徽陞按察使駐池陽值東服倡亂楚蜀齊魯間在在驛
騷齊魯淮徐接壤也繇廬桐至池不旬日而廬桐一帶
奸民潛伏待應士民岌岌瑛條議當務者六飭兩衛官
軍者十有二備守禦飭江防者亦十有二所轄池港二
營往月糧任役與僱役者兩分瑛優給之任役者得糧
踰常時無不願効死者歲有督漕役屆期齊魯羽書狎
至有司及諸弁議畱停瑛曰事急尚圖勤王甫動便思
觀望謂臣義何且此議一興是使四方信其亂也挺身
前行嚴飭諸郡逗畱者罰後亂靖無不服其卓識瑛食

泉州府志

卷之四十九

明循績

八十一

不過二簋服不厭浣洗苞苴不至其境筐幣不入于庭
郡舖戶素苦賠累槩令不用居常勵精達旦不寐屢乞
休不允卒于官池人祠祀之

閩書

林應翔字源澠號負蒼後更號止巖又號念不先生同安
人萬歷甲午順天鄉薦乙未進士知永嘉縣歲苦疫春
夏尤甚骨肉周親相棄應翔爲申收恤之誼又立五靈
廟祀厲鬼疫遂絕歲旱縞衣躡屩迎龍母五十里外雨
大沛止其所治採礦中使至多方阻之民賴以全丁外
艱起補京山巡歷勸課停車決訟不使至庭楚藩構逆

郢中騷動練兵葺城天塹井然遷南戶部郎督儲鳳陽
出守汝寧汝黃之交有逋逃主號自在王應翔殲其魁
而瀦其宮調廣州決積牘千六百卷平反死獄以八十
餘一日棄官歸起衢州禮宣聖之後恤趙清獻子孫貧
乏者修郡志造橋建塔便民興士爲龍游民陳利病罷
協濟本色訪擒劇盜滕奇兄弟覆其巢穴開化有程五
龍等盜戕殺官兵使者發兵捕治近村民惶惑鼓譟逐
之兵歸告使者村之千餘家盡勝廣也應翔曰無恐獨
入巢繫其戎酋烏合悉散良民得全肖祠祀之遷湖廣

泉州府志

卷之四十九

明循績

八十二

副使未之官卒年六十二應翔好道術兼通釋氏遺外
絨冕不嬰世念嘗自爲念不先生傳謂其爲文不古不
今功名不浮不沈仕宦不穢不清治產不縮不贏軀貌
不高不低才情不巧不癡於物不兜不撇於人不冷不
熱里評不善不惡人品不雅不俗命其子曰卽死以此
志我母求人爲也其文奇矯變化不可方物

所著有止崑存稿

閩清

書叅

白堂稿

同安志

楊萬廉字有孚號振奎晉江人輿六世孫少孤事母至孝
出就外館與光孝寺相近母病盲每夜靜僧眠必潛往

寺門慟哭乃歸時時爲母舐目得復明待兄弟友愛備至弱冠授徒每館人餽食忍腹而分飽之以歲入館金爲同母弟三人婚娶毫無私蓄爲諸生後歷試前矛值族人將南衢祖祠鬻於貴人堅持不可竟鬻之萬歷丁酉舉於鄉樹幟其門示必復越年訟於府太守竇子偁斷贖有爲行成者議於奎章舊里擇地蓋祠以償萬廉堅執必得故地庚子將上春官貴人遣僕賫三百金爲壽跪竟日不起峻卻之至京欲繕疏叩闕適貴人子在焉給以歸家聽贖遂不果上辛丑以副榜授溧陽教諭

泉州府志

卷之四十九

明循績

八十三

每資貧士以婚娶喪葬再上春官每日就道拈七題於驢背構腹稟夜就旅舍篝燈書之卒不第陞國子監學正蹉跎宦路憤祖祠未復作顛天苦詞縞巾終身朔望詣城隍廟焚詞致禱又盟神終身不過故里之門擢霸州牧一清如水州多宦官不與暱亦無苟取有以百金丐一扁於門者卻弗許遂中以讒左遷韶州通判郡有滄光廠權及太平橋鹺兩司其政網稍疎竟缺額三百餘金慨然曰必欲苛征以足額使商民虧貲折直非余能也然循是以往終必大缺遂告歸貧弗能償缺額東

莞直指徐兆魁假館授餐爲謀假貸以足之同年徐縉
芳嘗問政于主考劉曰寧寧曰往請教楊有孚足矣至
家淡泊自甘仍理故業從者如雲猶割修脯以助戚屬
故舊會太守竇公復來轄閩萬廉再訟之送司空何喬
遠調處議償以蔡巷之屋妥祀萬廉不能違乃鬻之而
購東衢之祖廬立祠卒以爲憾性嚴毅不苟言笑然諾
雖久必踐燕居如齋盛暑不脫冠徒步里中無異寒素
學者稱爲振奎先生泉中若林欲棟欲楫王際達萬金
李奐李之佳林有科馬用錫張朝綱唐朝誥吳淳夫皆

泉州府志

卷之四十九

明循績

八十四

其門人獨謂淳夫心術不端後雖貴顯必被禍卒果驗

年七十六卒所著有四書說

閩書叅通志
楊氏家傳

洪啓哲字子愚號懷蓼晉江人南安司訓猷子由德化學
生領萬歷丁酉鄉薦授福安諭以父猷周易翼義四書
約說二書梓行學舍訓課多士遇文會躬坐上堂爲文
程之士多獲雋遷饒平知縣賦夥民頑豪右相啗啓哲
飲檠茹冰殫力調劑無媿嬰亦無下嘍秩滿入覲爲忌
者所中謫浙江按察司經歷旋擢平陽令念越地困繭
絲每催科夏輸什之六秋什一輒弛不徵郡下催檄如

雨胥以郡指嚇啓哲怒曰叱嗟守而祖令而父母也挾
祖權凌父母可乎笞而遣之於是郡置平陽賦不問民
得少甦將屆滿而長沙之謫至矣抵家稍葺舊廬不入
城市惟以未獲致命父母爲憾會使者采風覈其父文
行祠於鄉南安郡亦祀名宦人謂不減贈秩之榮焉年

七十二卒

採雲臺
藏稟

□秉正字子誠號惺臺晉江龜湖人萬歷丁酉舉人授龍
川令邑當孔道歲比不□民疲奔命秉正均徭平賦弭
盜賑荒興學校重教化試童子列前茅者多飛翀士服

泉州府志

卷之四十九

明循績

八十五

其神眼龍俗常誣命獄未成而產先折特嚴反坐之條
風白此息大造稅契向□勒單吏緣爲奸秉正令良戶
自供賦冊隨印隨發一洗奸胥沈溺之窟以最擢溫州
府同知故事貳是郡者年掌稅二季秉正清軍鏹卻常
例拂太守意僅授稅一李夷然不屑也旣而署郡篆上
官稔其賢方用薦爲實守而秉正竟告歸閉戶自守不
通有司一刺置祀田周宗族冲和夷猶不修邊幅太史
韓若海稱其披襟坦腹飲人以醇貌如衷久如初理邑
如治家爲政數年如一日蓋實錄云秉正有心忠厚不

趨時炎有上官落職取道龍川他令弗爲禮秉正待之
倍初房師潘公督粵學見其供帳澹樸語之曰師生固
無督過但爲令飭傳舍似不若是唯而退弗爲謝殆異
於俗情之冷暖矣採張二水撰誌

林欲棉晉江人萬歷丁酉舉人榜名喬棉改今名授程鄉
令實心任事勤於咨詢會歲歉飢民幾揭竿欲棉亟行
賑濟躬詣各鄉散給亂萌以銷程民戴德後陞戶部員

外郎

廣東通志

張賡晉江人萬歷丁酉與人授平湖教諭卻修脯絕餽遺

泉州府志

卷之四十九

明循績

八十六

同官貧不能給者分俸咨之所獎拔士多登高第己未

丁艱去弔賻悉謝不受歸橐蕭然

平湖縣志

黃翼登字學衡南安人父思通有文名母吳氏嘗拾遺

橐翼登萬歷丁酉舉人會試兩列副榜丙辰授鐸河南

陞國學纂修實錄館史天啓閒出知德慶州俗故雜猺

刁悍里甲多包收逋負登下車設單剔釐宿弊一清潔

己愛民催科有法民爭樂輸嚴禁服毒圖賴修輯州志

士民德之轉武昌同知會右解木總運之役不辭盤錯

毅然任之清慎自矢以稱職加工部員外郎仍舊掌事

是時登以外吏內擢朝廷方倚重其才乃恬然賦歸弗顧也內行淳備尤敦孝友修譜系立家禮捐祀田泊然家居無市闐之跡公府之步卒年七十有九所著有尙

書述解詩文集行於世

南安縣志參
德慶州志

陳應堂字獻甫號景梅南安梅溪人萬歷壬午舉人戊戌進士授大理寺評事所奏讞皆明允清四川獄焚香矢簡書曰有明神在至則亟與解網其著者成都千戶長以軍三十人守堡所當千餘番其揮帥實用貪暴起釁堡陷並坐辟亡何揮帥得征倭立功而千長獨繫應堂

泉州府志

卷之四十九

明循績

八十七

謂首禍者既以功贖在事者不應專坐松潘衛人格土夷至死用夷俗折產賠給猶坐絞應堂謂既責以夷俗不宜復坐以漢法二獄皆得論減又盜扳誣無辜者吏持之急其母買贓自枉訊者竟坐其子辟繫踰十年廉其冤立出之擢潮州府知府郡爲漳泉唇齒往來通道彼此假借爲奸寇滋法弛負海不可問爲加意防範五里一堡十里一塚行旅晏然尤畱心試士嚴若部伍當在任之年而一元二魁詫爲異事越三年復有第一人解額者皆其作人之大効也其時忌者將有所加應堂

遂奉母歸曰吾以一祿榮親願畢矣越歲丁母艱哀毀骨立服闋不復出日督諸子讀書謂之曰吾三歲後太安人促早起以爲常自居官至今卽夜半就枕未嘗五更高臥稍輾轉若太安人傳呼驚起也應堂儉約自持而收郵族人外姻增創大宗祠建造鳳凰橋傾囊無所吝性醇和與物無忤輿論歸之

採克薪
堂文集

蔡增譽字宏耀號情符晉江龜湖人萬歷甲午舉人戊戌進士授戶部主事管崇文門稅時權採璫使正橫有權璫以稅請寬談笑卻之璫戒勿犯督吳監兌明要束躬

泉州府志

卷之四十九

明循績

八十八

督勵期於料量惟允俾庚癸無呼鼠雀不壯出爲松江守下車詢民不便次第設解法所必持雖藉上官爲媾不稍徇松多疑獄久淹莫決未浹旬剖豁如洗聽兩造罷勾攝令自詣片言立折胥役無所容奸郡多伏莽清保甲慎封守寇匪烏散戶不夜扃征科酌緩急而輕重布之不度者寬其額民以樂輸瀕海亟於兵餉豫爲規畫儲峙以時給而戒蠶漁卒多激奮他若禁水葬毀淫祠汰治遊濬河渠修學宮賑貧士禱雨立應校試得人美不勝書遷江西副使治兵南瑞治一如松改視江西

學政試十三郡翕然號得人撫軍欲爲一年家子復青
衿增譽曰豈可以公典奉貴要鬻私恩持勿許嘗署臬
篆直指以風聽欲繩法司中吏執不可曰往例司中吏
有過應本司自糾毋以吾代庖失百年規體事亦中寢
移行省叅政卒于道卒之日泉中天馬山鳴三日裂丈
許其深不測陳眉公碑頌謂其器局凝重詞令簡確張
弛甘苦多有妙裁云

採樗全集

邱應和字中甫號致齋晉江人有崑子隨父宦燕邸卒業
成均萬歷戊子順天鄉薦戊戌進士出同里史繼偕之

泉州府志

卷之四十九

明循績

八十九

門除全椒令興善鋤強有子衿凌於豪商者商故閩籍
兩造至前覬應和念維桑應和奮髯呵之立置于法有
巨猾行子母錢坐法卽訊初欲爲梗陽人相溷和持之
急則又詆欺出謾語治之如律椒故尠積貯和於常平
倉外別立社倉令好義之民主之歲雖歉不害調繁寧
國縣戶口賦役視椒數倍增社倉修鬻序黨塾有訓里
賦有衡撝蠹剪莠不遺餘力而真誠惻怛之意流溢法
外歷戶部初試黃土諸倉處臺省及中貴人茹納得體
再筦下糧廳嚴尺籍立掣籤新舊閒發胥無得下上士

卒帖然無譁三督儲密雲制臺西蜀蹇公博大夷直應和以精簡劑之于時封椿之鍵塵封太倉之積如洗兵缺數月餉時時思譁伍應和至而庚癸不呼仍預爲散給毋令全軍後時權貸馬價毋令商賈久滯每歲杪詢訪諸子衿與其父老貧有賑孤有餼出備兵東甌值閩粵烽火久靖一切安靜寧一鎮之暇復期會子衿諄諄訓詔之歲餘文風灑然一變未數載告歸應和舉業之外博稽諸司掌故畱心世務既登仕籍劃然中竅嘗自題其像曰我古其貌亦古其心世莫我知亦莫我親兄

泉州府志

卷之四十九

明循績

九十

應賓萬歷丙子舉人子思周萬歷順天戊午舉人

林夢琦字幼圭晉江人萬歷甲午舉人戊戌進士授平湖令忤上官左遷贛州教授歷電邑令陞南評事遷寺正出守南安調南寧時大荒後民在瘡痍下車問疾苦開倉賑濟秋大熟民得不病天啓二年以平寇功擢廣西副使會黔酋變疏請視師躬擣賊壘破白坎花園諸巢復奉檄入普安剿撫二十餘寨黔人勒石紀德建祠祀之尋以餉匱爲忌者所中罷歸家徒四壁戶不蔽風雨

及卒親友醵金以殮司閹董羽生捐地葬之

西通志參廣

黃琰字瑩甫號姬璧晉江人光昇孫萬歷丁酉戊戌聯成進士授南海令庶政畢舉簡斥世緇邑饒稅契率匿四而報一琰所稅萬八千金盡數登報委查番舶令商自言應納額後人極力搜取額反少監司章公邦翰問其故琰曰搜則受商詐故額少令自報納彼不敢少言雖不盡利宜多人服其才識丁內艱起補餘姚牟山湖爲通邑水利豪家傍侵爲田申請剗平之萬民利賴而薑尾肆毒口碑不勝目懾擢南京戶部主事甫數月而浙

泉州府志

卷之四十九

明循績

九十一

中鹽院白簡至矣旣歸日惟與琴書爲伍偕同志陟巢雲諸名勝飲酒賦詩浩然自得晚自號百拙居士營生塚預爲文自誌焉琰爲文踔發沈深砥川柱流墓銘傳志非深知可傳者不屑作詩則力追盛唐尤慕元亮子美摩詰樂天諸風雅爲人剛毅渾厚擇友而交言行不苟於書無不窺至山經水元尅擇諸書皆精研術家與談輒斂手年七十卒無子以族子維圩爲嗣

節呂天撰傳

林廷雲字子騰晉江人萬歷丁酉戊戌聯第進士其爲諸生時受知太倉王敬美以進之其兄元美而文日益進

歷官刑部郎兩淮運判有獄志有齟志具見綜截爲南
戶部管倉政嚴收必速不至病解慎放必足不至病軍
朽蠹餘粒輒推爲守支者代輸先本倉而後及其他先
最老且久者而後及其次倉攢得脫守支者凡數十人
其後復議行水兌改折諸倉歲可多出米十四萬石後
來得脫守支者又歲歲可十餘人諸守支得脫告去者
咸感廷雲廷雲曰盡吾心而已

閩書

鄭際可字道行號龍巖晉江人萬歷己亥歲貢廷試第一
授清流訓導轉三水教諭署邑篆所至以誘掖後進爲

泉州府志

卷之四十九

明循績

九十二

務官舍披閱達旦不休月三課士躬自評隲羣服其冰
鑑勤而匱者捐貲給之督學王公表之曰正以立身勤
以課士學則淹博才則練達獎進俊彥也仁體恤匱乏
也義蓋實錄云陞益府教授致仕歸卒年七十八

節家傳

陳穀字次卿一字式洲號天桓同安人健曾孫俊子萬歷
庚子舉人榜名士佺雋後改今名初授無錫教諭有知
人鑒擢廣東新安令剛直廉平首除劇惡嚴詰奸胥寬
里甲恤編民免贖鍰清羨餘積蠹宿弊釐剔殆盡築兩
炮臺于城北隅以固守禦甫年餘以忤權貴去行李蕭

然父老攀號遮道車不得前民思其德祠于南頭西鄉
後補藍山令勤于撫綏民有寧一之頌既歸年六十九
卒於家

廣東通志同
安志合參

蔡立敬字惺甫號熙齋晉江人立愛弟萬歷戊子舉人辛
丑進士授戶部主事思念二親假遼陽之使迂途歸省
父母趣還朝監兌兩浙軍民兩調竟兌無譁大司農廉
其才題筦通庾精心剔蠹冰檠皦然所積羨以萬計濟
南趙南渚持報牒宣示曰是洗手奉公者秩滿陳情歸
養將抵舍而父歿痛不欲生侍母承歡凡五載及丁內

泉州府志

卷之四十九

明循績

九十三

艱與兄立愛勞苦山原擇兆營葬服除就銓授兵部武
選郎中尋轉武庫所出入百司薪馬及內供商役有廉
聲出爲浙江叅議溫處道所治在萬山中最稱陜薄值
歲歉民流輒便宜傾廩賑之全活無數爬搜吏蠹清檢
積牘心手俱瘁以勞成疾方具牒乞休竟卒于官年五
十五立敬信臆直躬意所不可必見于面而胸無城府
接人坦然計樞二曹視國事如己事分藩數月未及大
展其用未及下壽遽隕厥躬惜哉

採家乘參
亨文撰誌丁

黃淳中字嗣真號還庭晉江人榜眼尚書鳳翔子爲諸生

捷戶呶唔無貴胄紈綺態應明經辟入成均當得官棄
去以父蔭授南京前府都事遷中府經歷南戶部員外
櫛垢抓蠹不避繁瑣擢南刑部郎中據律推情準以仁
恕多所平亭出爲柳州府知府爲政廉平率因土俗設
教禁範以禮法際大禋後瘡痍未起與民休息庭可張
羅兩造至片言立剖爰書手定吏無敢舞文高下勸課
多士親題甲乙諸經指畫爲文詞悉有法度可觀旱則
率僚屬齋沐步禱甘澍應焉柳人謂當遠繼河東而以
不善阿容爲同官中蜚語去之日父老攀轅不忍釋就

泉州府志

卷之四十九

明循績

九十四

調都門以病卒年六十九

採敬
日草

翁日躋字與新號殷盤永春籍晉江人戶部員外郎堯英
子嘗隨父令懷集胥役嘗以暮金立白父痛繩之以序
貢入太學五年銓授吉安府通判矢心廉慎異時郡倅
耽閒養尊督餉多委之邑佐日躋瑾竇塞穴寬爲期會
而躬程督之吏不得詭借巧索爲染指計卽邑佐亦受
成供事而已歷攝永新永寧諸邑胥役稔其嚴明盥手
奉法詢利病爲興除郵檠獨緩催科葺黌宮禮青衿講
德考業循聲焯起性敏達善斷邑有疑難事必詣剴決

禾川兩巨室爭郭外甌脫地民與士交鬩不相下以其
事屬日躋檄學博邑佐偕往按視士鬩者學博糾之民
鬩者邑佐糾之兩巨室凜凜各持券對簿叅互左證直
枉立剖卒于官囊篋朽然僚屬捐俸助斂士民皆隕涕
子爲樞萬歷庚戌進士鎮江知府

李寯字宏中晉江竹樹人萬歷癸卯舉人選授惠來知縣
時弟之佳亦選南漳將別寯謂之曰吾椎才拙守不能
如世人罄折囁嚅視上人息然亦不敢剛狠愎斷自矜
摘伏爲赫赫名但竭吾心力揭肺腑昭示百姓從黃趙

泉州府志

卷之四十九

明循績

九十五

後齒循良聲一二狀稱通經術不失家世足矣旣之邑
與士民更始捐俸學舍延見諸生課經問業士風蔚起
地濱海民多剽掠聚亡命爲奸有惡少數輩橫行不逞
採父老陳利害狀分別罪遣之仍用爲兵捕計擒海寇
三姐老等三十餘徒殲其魁境內肅然歲飢流離載道
以一胥一役步行村落第飢民爲三等計口分給不染
里中絲毫而活者千餘家已苦大水颶風飛石飄屋民
無完廬壓溺死者相枕藉給資斂瘞皆骸不暴會澄海
缺令檄令兼署問民疾苦加意拊循櫛垢疏滯冤無不

白三月旋惠遮道泣留者萬計伐石紀庸竟以勞成疾

卒于官

探霞樓藏藁

蔡鍾有字恒卿同安人萬歷癸卯舉人授興國令嫻於吏職能得物情邑黠訟者託他籍徧控關提淆亂請於上官痛釐治之永樂中屯田至成宏閒漸蕪府檄召民墾荒給帖爲業已墾者軍復爭之前令何應彪以刁軍害民請禁未久復爭郡守金汝嘉頗庇軍鍾有條陳源委言多切中守不能易修輯縣志手自編纂自是文獻有徵前令吳宗周倡造石橋甫竣工鍾有復翼以扶欄亭

泉州府志

卷之四十九

明循績

九十六

楯雄麗壯觀行人利賴卒以古心直道不容於時左遷徐州倅守呂梁河堤河漫決無時奔漲疾風乘舫行波中幾葬魚腹者屢山東妖寇發去徐三十里鍾有以河夫爲卒畚鍤爲兵拒賊河上賊竟北潰走轉分水令卒

官

閩書參西江志贛州府志

洪纖若字時育同安人萬歷甲辰進士筮仕提刑讞獄詳慎璽書褒榮之累陞司憲兩粵有巨盜鄭詵歷年寇害閩浙江淮閒纖若懸貲購黨擒之諸路悉平及權璫竊柄有議毀澹臺子羽廟以建魏祠者纖若刀排不許事

遂寢未幾歸卒

同安志

蘇懋祉字子介號碩園晉江人父存淑爲諸生古君子也懋祉事之至孝與兄懋祺同受學于李光縉懋祉萬曆庚子舉人丁未進士初授南召令邑處萬山中多礦穴河嵩閒亡命視爲逋藪至則嚴礦盜招流移墾荒田鋤猾胥冠婚喪祭著爲定式課諸生品其高下爲文式之戒部民無輕訟無游惰無淫侈不數月翕然丕變文學斌斌臺使疏其能移寧陵值河決後諸爲久遠計給牛招耕裁馬快以充墩夫工食片言決獄門無暮金所上

泉州府志

卷之四十九

明循績

九十七

爰書盡報可丁內艱服除補歙縣未幾以疾卒懋祉清才遠器卓然有立其令寧陵時安慶鄭三俊爲歸德守後來督學閩中遂檄祀之學宮其檄文曰公先令寧陵與當職有一日知其縣河決後鞠爲茂草小民流徙且盡當事者特疏公移自南召公蠲煩去苛均地均役築城築堤誅闢榛莽彈壓豪強凡可利民膚髮靡愛卽古循良無加也艱歸垂橐邑鄉賢紳爲貸金資之主僕三四人行李一二擡而已及公補歙羶地也俗用貲雄無堅不破公移書知己曰蘇子始終決□□截人者半載

風行闔郡如歸聞公居鄉易米而食人知公之鄉論也其官評則當職知之名位未顯功業未著當職不言後

誰知公耶

閩書叅

景璧集

蔣芳鏞字任坦同安人萬歷丁未進士初授戶部主事差管海運新泰二倉聞父病卽請假歸省補工部營繕晉虞衡督寶源局出守建昌以明斷失權貴意移衡州時安奢作梗徵兵徵餉徵運衡民苦之芳鏞至開鼓鑄代餉歲省民輸萬金復捐俸賑飢刷冊均糧通漕鹽罷逋米蔭湘薇峙皆立祠焉擢郴桂憲副未及涖而卒

同安志

泉州府志

卷之四十九

明循績

九十八

莊毓傑字贊甫號立寰惠安霞曾人應楨姪孫萬歷丁酉舉人丁未進士觀政工部期滿請假省親時李廷機爲相諷之曰國家方選士鑾坡金馬君得無意乎對曰傑忝先生兒女姻欲引去遠嫌耳李高其識越年選授戶部主事故事初至部夜當巡警法久玩鮮入直者毓傑直夜必入宿警柝人役盡諸司吏廉其曠怠扑責之或曰如忌器何正色對曰官各有法吾執吾法何忌之有役始加警已管南石渠草場管四門倉白糧倉四門倉者列衛軍士糧餉白糧倉則大內庾廩在焉中貴胥吏

蠹蠹其中毓傑禁革諸弊勾稽出納無從乾沒有中貴
蒼頭作奸繩以法中貴惶恐排闥入至榻前求解兀不
爲動中貴出而大恚曰官家豈少一主事奈何衆辱我
卒亦不能有所加倉故有木板以遠卑濕年久剝落米
多紅朽稽舊制請之大司農以匱辭檄屢上幾與忤度
不得請則捐俸購木藉之倉事竣請轉餉密雲爲歸計
大司農趙南渚公止之曰君廉且才方大用此行非君
宜也毓傑曰母七十餘矣岵陟又在望倘得便道依慈
親一登先君子坵壠是所願也始得請歸抵家數月卒

泉州府志

卷之四十九

明循績

九十九

無子宗人議以仲兄次子鼐嗣之

節景璧集

李佺臺字仲方號爲輿南安人州守應先子萬歷丙午經
魁丁未進士任鎮江教授遷國子監助教陞戶部主事
歷員外郎中陞廣東右叅議署南韶道削平九連山寇
民賴以安陞雲南按察使有土官普名聲謀逆案多羅
織悉平反之遷湖廣分巡荆西埽定江賊有捍禦功陞
右布政月餘復攝荆西遷浙江加左布政分巡金衢修
江山橋以利往來尋實晉左轄歲荒倡義捐賑全活甚
衆報最得贈祖父如其官陞光祿寺正卿刀辭不赴歸

淡泊茹約恬如也年六十六卒子元錄順治辛卯舉人

易門知縣

南安縣志

郭如楚字樾甫號復菴晉江人良璞子萬歷丙午丁未聯捷進士授金壇令行取入爲御史熹宗嗣位疏陳李選侍不應加封諸臣應與大臣一起哭臨行禮李可灼不應濫受金幣侃侃數百言臺議偉之天啓閒陞太僕寺少卿以忤魏璫假歸卒于家子煒孫世純郭氏世紀

泉州府志卷之四十九終

泉州府志

卷之四十九

明循績

一百